

薪膽叢書第十種

兩浙

正氣集

浙江省抗日自衛委員會

戰時教育文化事業委員會編行

C.S.P.

『天地有正氣，雜然賦流形，下則爲河嶽，上則爲日星，於人曰浩然，沛乎塞蒼冥。……是氣所磅礴，凜烈萬古存；當其貫日月，生死安足論？地維賴以立，天柱賴以尊，三綱實繫命，

爲之根。』

——節錄文天祥正氣歌——



80787374

編輯例言

一、本集爲薪膽叢書第十種，旨在介紹浙省先賢之愛國詩歌，發揚民族精神；並培養一般青年對於古代詩歌涵詠之情緒，藉使體認先賢克完大節之志趣與言行。

二、所選以浙籍詩人之浩氣吟詠爲限，凡忠君憂國，臨難就義，以及表彰氣節懷古幽思之作，悉加甄錄。其有雖非詩家，而吉光片羽足存千古者，尤爲珍視，蓋激勸忠義，本古風人之遺意。

三、本集依作者時代先後編次，上自南朝，下迄清季之各體詩，皆有存錄，一以思想意識爲前提，而作品藝術爲次要，至於各家各體選存之多寡，并非藉作優劣之銓衡。

集所選，就個人言：以陸游、林景熙、汪元量、張煌言及秋瑾等作，所佔數量較夥，蓋或以人傳，或以詩傳，并足爲青年景仰之資。

人之作，概未甄錄，一以編者見聞所限，搜集選擇，有費時日；一以杜絕



標榜，避取生存，亦昔賢著錄示可之例。

六、所選各詩，酌加解題及注釋，或存或略，或簡或繁一視典實深淺而定。至於注釋部份，爲求適合青年閱讀計，僅解簡約詞意，原典出處，概從省略，其有未明，亦付闕疑。

七、篇末附錄作者小傳，依時代先後排列，并以民國紀元爲準，各繫生卒之年；其或生卒不詳，則取生卒前後較近之年爲準，自信對前人詩選訂正時代之誤頗多。

八、抗戰期間，交通困難，本集取材，不易湊手，因以時作時輟，毀棄亦復不少，如續有搜獲或發見疵謬，當俟再版時分別增廣或修正。

目次

作者 頁數

白馬篇

沈約

一

白馬篇

孔稚圭

二

詠霍將軍北伐

虞羲

二

戰城南

吳均

四

胡無人行

前人

四

入關

前人

五

邊城落日

駱賓王

五

從軍行

前人

六

行路難

前人

六

突厥三台

盛小叢

六

贈涇州王侍御

李頌

七

正氣

兩浙

錄 目

經符堅墓

題磻溪垂釣圖上錢鏐

西施

聞嶺外寇梗

感時（有序）

哀隆德守臣張確

自作哀詞

書憤

送七兄赴揚州帥幕

樓上醉書

獵罷夜飲示諸生

又書憤

冬夜聞角聲（一首）

吳融

羅隱

前人

趙抃

宗澤

滕茂實

前人

陸游

前人

前人

前人

前人

前人

七

八

八

八

九

一〇

一〇

一一

一一

一三

一四

一四

一五

十一月四日風雨大作

排悶

書事

雜感

追感往事

題海首座俠客像

塞上曲（三首）

雪中忽起從戎之興

冬夜讀書有感

白露前一日已如深秋

追憶征西幕中舊事（二首）

軍中雜歌

太息（一首）

前人

前人

前人

前人

前人

前人

前人

前人

前人

前人

前人

前人

前人

一五

一五

一六

一六

一七

一七

一七

一八

一八

一九

一九

二〇

二〇

目錄

估客自蔡州來

前人

二〇

感事

前人

二一

讀范致能攬轡錄

前人

二一

秋夜將曉出籬迎涼有感（一首）

前人

二一

北望

前人

二二

聞武均州報已復西京

前人

二二

冬夜不寐至四鼓起作此詩

前人

二三

客去追記座中所言

前人

二三

示兒

前人

二四

送曾繼先赴山陰路鈐

陳傅良

二四

送張定叟尙書鎮襄陽

樓鑰

二五

讀王建射虎行

范浚

二七

盱眙北望

戴復古

二九

江陰望浮遠堂

前人

二九

釣台

前人

二九

讀真德秀疏

前人

三〇

挽豐山先生

洪咨夔

三一

拜卞忠貞墓

周洎

三二

博浪沙

陳孚

三三

書几上

趙卯發

三四

陶山十詠和鄧牧心

林景熙

三四

秦望山

前人

三四

題贈放翁詩卷後

前人

三五

題歐陽文忠公歸自北寄呈（并序）

前人

三五

題寺作（四首）

前人

三六

冬青花

前人

三七

錄 目

弔太學同舍徐應鑣

前人 三八

拜岳王墓

前人 三八

讀文山集

前人 三八

題陸秀夫遺像

前人 三九

讀張巡傳

周權 四〇

天馬

鮑輓 四一

岳鄂王墓

趙孟頫 四一

悼文丞相

潘音 四二

挽太學正節先生徐應鑣

何夢桂 四二

湖州歌（四首）

汪元量 四三

越州歌（二首）

前人 四三

錢塘歌

前人 四四

答方石田

前人 四四

集氣正浙兩

題王導像

前人

四五

居延

前人

四五

北師駐皋亭山

前人

四六

醉歌（二首）

前人

四六

館娃宮

尹廷高

四七

獨松節士歌（并序）

楊維禎

四七

昭君曲

前人

四八

花門行

前人

四九

題段將軍征羌圖

宋濂

五〇

陸秀夫像贊

前人

五〇

題李陵見蘇武圖

劉基

五一

悼文山

胡奎

五一

征夫詞

劉績

五二

錄 目

征婦詞

前人

五二

雙廟辭

張憲

五二

厓山行

前人

五三

戍婦吟

劉仁本

五四

感懷

朱希晦

五四

咏犬

于謙

五五

石灰

前人

五五

出塞

前人

五五

秦寡婦良玉

張甯

五六

龕山凱歌(二首)

徐渭

五六

宴游爛柯山(三首)

前人

五六

關西老將歌

鄭國賓

五七

凱歌(一首)

沈明臣

五八

臨終題案

趙天生

五八

絕命辭

陳良謨

五九

臨終別親友（二首）

陳函輝

六〇

絕命詞（五首）

前人

六〇

塞上曲

胡應麟

六一

出塞曲

王用賓

六二

絕命詩

張國維

六二

避地日本感賦（二首）

朱之瑜

六二

臨難題案

祁彪佳

六三

過大營舖讀岳少保金沙寺題壁

林棟隆

六三

聞諸路起兵信

王藥師

六四

絕命詩（三首）

莊元宸

六四

揚州哭史督輔老師墓

韓釋祖

六五

乙將軍歌題劉公舫所作傳後

絕筆

絕命詩

書懷

北還入浙偶成

庚子元旦駐師林門

驚聞行在之變

憶西湖

甲辰八月辭故里（二首）

被執過故里

師入甯國

即事

十年戎馬

安丹生

陳潛夫

陸培

張煌言

前人

前人

前人

前人

前人

前人

前人

前人

前人

六六

六六

六八

六八

六九

六九

七〇

七〇

七一

七一

七二

七三

七三

兩浙正氣集

復趙督台（二首）

挽張鯤淵相國（一首）

弔沈五梅中丞

追往（一首）

絕命詩

張司馬墓

蒼水

釣臺

卓烈婦（四首）

卓烈婦

贈柳生

出關

釣臺

前人

前人

前人

前人

前人

黃宗羲

前人

前人

前人

黃達

毛奇齡

徐蘭

洪昇

七四

七五

七六

七六

七七

七七

七七

七八

七八

七九

八〇

八一

八一

詠史

秋夜宿葛嶺涵青精舍

男從軍

謁岳王墓（七首）

湖上雜詩（二首）

費宮人刺虎歌

曾襄愍銑

蔡忠襄公祠

雙忠祠

鳳凰山懷古

木蘭

史墩

秦淮弔方女殉節處

陸次雲

八一

厲鶚

八二

胡天游

八二

袁枚

八三

前人

八四

前人

八五

嚴遂成

八五

前人

八七

吳錫麒

八七

前人

九一

陳文述

九三

前人

九四

前人

九五

集氣正浙兩

題壁（并序）

黃天蕩

湯陰謁岳忠武廟

吳山謁伍相祠（二首）

驛次題壁

光復軍口號

杞人憂

寄友

對酒

黃金台懷古

失題（二首）

觀日俄戰圖有感

題芝龕記（六首）

袁祖志

柴靜儀

俞樾

黃燮清

查蕙纈

秋瑾

前人

前人

前人

前人

前人

前人

前人

九五

九六

九六

九七

九八

九八

九九

九九

一〇〇

一〇〇

一〇〇

一〇一

一〇二

錄目

感憤

日人石井君索和即用原韵

感時

黃海舟中感懷（二首）

前人

前人

前人

前人

一〇三

一〇三

一〇四

一〇四

兩浙正氣集

白馬篇

沈約

白馬紫金鞍，停鏢過上蘭，寄言狹斜子，詎知隴道難！赤坂途三折，龍堆路九盤，冰生肌裏冷，風起骨中寒。勒石燕然道，凱歸長安亭。縣官知我健，四海誰不傾。但使強胡滅，何須甲第成。當今丈夫志，獨爲上古英。白馬金具裝，橫行遼水傍，問是誰家子？宿衛羽林郎。文犀六屬鎧，寶劍七星光。山虛弓響徹，地迴角聲長。宛河推勇氣，隴蜀擅威彊。輪臺受降虜，高闕剪名王。射熊入飛觀，校獵下長楊。英名欺衛霍，智策蔑平良。島夷時失禮，卉服犯邊疆。徵兵離薊北，輕騎出漁陽。集軍隨日暈，挑戰逐星芒。陣移龍勢動，營開虎翼張。冲冠入死地，攘臂越金湯。塵飛戰鼓急，風交征旂揚。轉鬥平華地，追奔掃鬼方。本持身

集 氣



（題）丁福保全齊詩，注云：「第二首文苑英華作隋煬帝。」

（注釋）上蘭 觀名，在陝西長安。赤坂 今陝西洋縣境。龍堆 今蒙古境。輪台在今新疆

。高闕 塞名，今內蒙鄂爾多斯右翼。漁陽 今河北密雲。東方 在今貴州。

白馬篇

孔稚圭

驥子跼且鳴，鐵陣與雲平。漢家嫖姚將，馳突匈奴庭。少年鬥猛氣，怒髮爲君征。雄戟摩白日，長劍斷流星。早出飛狐塞，晚泊樓煩城。虜騎四山合，胡塵千里驚。嘶笳振地響，吹角沸天聲。左碎呼韓陣，右破休屠兵。橫行絕漠表，飲馬瀚海清。隴樹枯無色，沙草不常青。功名志所急，日暮不遑餐。長驅入右地，輕舉出樓蘭。直去已垂涕，寧可望長安。匪期定遠封，無羨輕車官。唯見恩義重，豈覺衣裳單。本持軀體答，幸遇身命完。

（注釋）嫖姚 指霍去病，以嫖姚校尉，六擊匈奴。見漢書霍去病傳。飛狐 嶺名，在今河

北涿源。呼韓 卽匈奴呼韓邪單于省稱。休屠 讀如朽除，匈奴屬王之號。定遠

班超封定遠侯。輕車 官名，輕車都尉簡稱。

詠霍將軍北伐

虞羲

擁旄爲漢將，汗馬出長城。長城地勢險，萬里與雲平。涼秋八九月，虜騎入

幽并，飛狐白日晚，瀚海愁雲生。羽書時斷絕，刁斗晝夜驚。乘墉揮寶劍，蔽日引高旂。雲屯七萃士，魚麗六郡兵。胡笳關下思，羌笛隴頭鳴。骨都先自聾，日逐次亡精。玉門罷斥堠，甲第始修營。位登萬庾積，功立百代成。天長地自久，人道有虧盈。未窮激楚樂，已見高台傾。當今麟閣下，千載有雄名。

（解題）霍將軍名去病，漢武帝時人。伐匈奴有功，先後凡六出，渡沙漠，封狼居胥山而還，拜驃騎將軍，封冠軍侯。武帝嘗爲建府第，去病曰：「匈奴未滅，何以家爲！」帝益重之。

（注釋）汗馬 言戰功也，戰馬疾馳而汗出。幽 古十二州之一，虞舜分冀州東北爲幽州，卽今河北遼甯二省；漢兼有朝鮮之地。并 古十二州之一，虞舜分冀東恆山之地爲并州，卽河北之舊正定保定，山西之太原大同等府；漢代以今山西及陝西之舊延安榆林等府地爲并州。瀚海 瀚海，北海名，羣鳥解羽於此，今稱沙漠曰瀚海。飛狐 飛狐口在河北涞源縣北，兩崖峭立，一線微通，蜿蜒百餘里，形勢極險。刁斗

古行軍用具，夜間擊以警衆報時，蓋如更鼓也。乘墉 乘，登也；墉小城也。七萃士 周漢之禁衛軍，七萃猶言七隊。魚麗 軍陣名，言如魚之相偶而成。六郡 隴

西，天水，安定，北地，上郡，西河。骨都 匈奴有骨都侯。嬰 音陷，失氣也。

日逐 匈奴有日逐王。亡精 喪亡其精銳之士。玉門 即玉門關，在今陝西。斥堠

偵探敵情之人。庾 十六斗為庾。麟閣 漢宣帝圖功臣十一人於麒麟閣。

戰城南

吳均

蹀躞青驪馬，往戰城南畿。五歷魚麗陣，三入九重圍。

名懼武安將，血汗秦王衣。為君意氣重，無功終不歸。

（注釋）魚麗陣 言如魚之相隨也，見左傳。武安 指白起，封武安君。秦王 指荊軻

刺逐秦始皇。

胡無人行

前人

劍頭利如芒，恆持照眼光。鐵騎追驍虜，金羈討黠羌。

高秋八九月，胡地早風霜。男兒不惜死，破膽與君嘗。

（注釋）芒 草名，其質甚堅，傷人如鋒刃。鐵騎 騎，馬兵也。人馬皆披甲冑，故稱鐵

騎。金羈 羈，馬絡頭也。金羈，金屬製成之馬絡頭。黠羌 黠讀如結，有陰狡意

。羌 西戎種族名。

入關

前人

羽檄起邊庭，烽火亂如螢。是時張博望，夜起交河城。
馬頭要落日，劍尾掣流星。君恩未得報，何論身命傾？

（注釋）羽檄

於檄文上插雞羽，欲其急行如飛，即羽書也。

邊庭

即邊城。

張博望

謂張騫，封博望侯。

交河城

漢車城前王國治，故城在今新疆吐魯番縣西。要勒

也。掣 曳也。

邊城落日

駱賓王

紫塞流沙北，黃圖灞水東。一朝辭俎豆，萬里逐沙蓬。侯月恒持滿，尋源屢
鑿空。野昏邊氣合，烽迴戍煙通。膂力風塵倦，疆場歲月窮。河流控積石，山跡
遠崆峒。壯志凌蒼兕，精誠貫白虹。君恩如可報，龍劍有雌雄。

（注釋）蒼兕

兕本水獸，又善奔突，藉以名水軍。蒼兕，主水軍舟楫之官名。見史記齊太

公世家。龍劍 浙江龍泉縣南五里，有水可用淬劍，昔人用水淬之，劍化龍去，

故名龍泉。見寰宇記。一說：雷煥觀斗牛間紫氣，掘江西豐城縣獄基，入地四丈餘，得龍泉太阿二劍。見晉書張華傳。

從軍行

前人

平生一顧重，意氣溢三軍，野日分戈影，天星合劍文。
弓弦抱漢月，馬足踐邊塵。不求生入塞，唯當死報君！

（注釋）一顧 言受人舉薦稱揚也。三軍 謂中軍及左右或上下二軍。

行路難

前人

重義輕生懷一顧，東伐西征凡幾度。夜夜朝朝斑鬢新，
年年歲歲戎衣故。絳節朱旗分白羽，丹心白刃酬明主；但令
一技君王識，誰憚三邊征戰苦？

突厥三臺

盛小叢

雁門關上雁初飛，馬邑關中馬正肥；日旰山西逢驛使，
殷勤南北寄征衣。

（解題）突厥 種族名，後魏時起於金山，至唐代大強，後分東西二部。突厥三台，係樂曲名。

（注釋）雁門關 在山西。馬邑 亦在山西。日吁 日斜也。驛使 驛站之吏。

贈涇州王侍御

李頻

日天書下紫微，三年旌旆隴雲飛。塞門無事春空到，邊草青青戰馬肥。

（解題）涇州 卽今甘肅涇川縣。

（注釋）天書 謂皇帝詔書。紫微 謂宮廷也。

經苻堅墓

吳融

百里烟塵散杳冥，新平一隰草青青，八公山石君知否？休更中原作彗星！

（解題）苻堅墓 在陝西古新平，今郿縣。苻堅，晉時前秦之主，爲五胡中最強盛者。

（注釋）八公山 苻堅大舉寇晉，與謝玄等戰於淝水，大敗，潰逃時，聞八公山風聲鶴唳，

皆以爲晉兵。八公山在安徽鳳台縣西北。

題磻溪垂釣圖上錢鏐

羅隱

呂望當年展廟謨，直須釣國更誰如？若教生在西湖上，也是須供使宅魚。

（解題）鏐令漁人日納魚稅若干尾，名使宅魚，及見隱詩，遂廢除。

西施

前人

家國興亡自有時，吳人何苦怨西施，西施若解傾吳國，越國亡來又是誰？

開嶺外寇梗

趙抃

驚說炎飆烟瘴時，洞蠻蠡起寇南陲。家書萬倍金難得，遠夢千迴路不知。刺史沒身專捍禦，諫官啣命救瘡痍。伏波死去今誰繼？大筆銘勳壓海涯。

（注釋）刺史沒身 康州趙潛叔死於敵。諫官 趙居武出趙潛叔使。伏波 將軍名號。

漢武帝以路博德爲伏波將軍，擊南越。後漢光武拜馬援爲伏波將軍，征交趾，平五溪蠻。

感時有序

宗澤

叢鹵長驅，京邑陸危，此忠臣義士痛心疾首勤王報國之秋也，而宰臣遷家，郡守踰垣，縉紳士大夫陸竄水奔，使人主嬰孤城以自守，無一犯難者，事小定矣，而上書獻策之人，亦未有慨然以東者，世道之衰，一至此乎！太息之餘，以詩自遣。

卿士辱多壘，天王憤蒙塵，禦戎要虜將，謀國須雋臣。百戰取封侯，未必亡其身；懷奸廢忠義，胡顏以爲人？吁嗟世道衰，大僂加縉紳。平居事奔競，梁汴分雲屯；一旦國步艱，四迸如星繁；輔相已擇棲，守令仍踰藩；冠蓋陸西竄，舳艫水南奔。鄙夫用慨然，策馬趨修門，勤王羞尺柄，悟主期片言。時來倘雲龍，峨冠拜臨軒，逶迤上玉除，造膝伸元元。措世於泰寧，歸來守丘園。

（注釋）虜將 虜首哮，虎鳴也，虜將猶稱虎將。雋 與俊通。縉紳 與搢紳同，謂插

笏帶間也。冠蓋 仕宦之服乘，故仕宦亦稱冠蓋。舳艫 音遂盧，方長船也。

修門 楚都郢城之門，猶言都門。峨冠 高冠，世稱士大夫爲峨冠博帶。臨

軒舊稱天子不御正座而御平台謂之臨軒。玉除殿階也。造膝接近帝坐也。

。元元指人民。

哀隆德守臣張確，確浮休張舜民弟，嘗爲烏延帥幕，獨不廷謁重貫，

詩以弔之。

滕茂實

睢陽萬古一張巡，忠義傳家有世臣。顏子服膺當入室，
潘郎望拜肯同塵。圍城抱恨天猶晦，仗劍臨危氣益振。嘆子
隣邦盡曹李，偷生端作九泉人。

〔解題〕張確，字子固，宋宜祿人。元祐進士，知隆德府，金兵至，諭使降。確曰：「頭可斷，腰不可屈。」遂戰死。

〔注釋〕顏子句 孔子稱顏淵得一善則拳拳服膺而勿失，學問已至精微之奧爲入室；顏淵爲孔子入室弟子。此喻張確學有深造。潘郎句 謂潘岳見賈充望塵而拜。曹李

世說新語：「曹蜎李志雖見在，厭厭如九泉下人。」

自作哀辭

前人

齋鹽老書生，繆作王都官，索米了無補，從事敢辭難？殊鄰復盟好，杖節來榆關，城守久不下，川途望漫漫。儉輩果不惜，一往何當還？牧羊困蘇武，假道拘張騫，流離念窘束，坐閱四序遷。同來悉已歸，我獨留塞垣，形影自相弔，國破家亦殘。呼天竟不聞，痛甚傷肺肝！相逢老兄弟，悼歎安得歡？波瀾捲大廈，一木難求安。昔燕破齊王，羣臣望風奔，王蠋獨守節，齊人有甘言，經首自絕脰，感慨今昔聞。未嘗食齊祿，徒以老爲民。况我祿數世，一死何足論！遠或沒江海，近或死朝昏，斂我不須衣，裹屍以黃旛。題作宋臣墓，篆字當深刊。我室年尚少，兒女皆童頑。四海無置錐，飄流倍悲酸，誰當給衣食，使不死飢寒？歲時一醉我，猶足慰我魂。我魂亦悠悠，異鄉寄沈寃，他時風雨夜，草木號空山。

（注釋）齋鹽 言貧寒也。繆 同謬。殊隣 異族也。杖節 謂持節爲使。何當還

猶言何時當回 假道句 謂張騫使月氏，往復俱爲匈奴所得，拘留後亡走事。

四序 猶言四時。波瀾兩句 謂大廈將傾，非一木所能支。昔燕句 謂燕昭王

使樂毅伐齊事。王蠋句 謂齊畫邑（一作蓋邑）人王蠋（一作王黜）不屈於燕，

自經 死事。 辭 音類，祭也。

書 憤

陸 游

早歲那知世事艱，中原北望氣如山。
樓船夜雪瓜洲渡，鐵馬秋風大散關。
塞上長城空自許，鏡中衰鬢已先斑。
出師一表眞名世，千載誰堪伯仲間。

（解題）忠義奮發，直以武侯自命。不知南宋斯時，君臣耽於宴安，弱勢已臻極點，雖有武侯，其將如之何哉？

（注釋）如山 氣盛貌。 樓船 史記：「大修昆明池，治樓船，高十餘丈，旗幟加其上，

甚壯」。 瓜洲渡 瓜洲在江蘇揚州縣南江濱，與鎮江成斜直線，其渡甚狹。 鐵

馬 卽鐵騎，人馬皆披甲也。 大散關 在陝西寶雞西南，爲南宋與金分界處。

塞上長城空自許 言已雖如塞上長城，而置之不用也。 出師表 蜀漢諸葛亮撰。

名世 孟子：「五百年必有王者興，其間必有名世者」。 伯仲間 伯仲兄弟也。

送七兄赴揚州帥幕

前 人

初報邊烽照石頭，旋聞胡馬集瓜洲。諸公誰聽芻蕘策，
吾輩空懷畎畝憂。急雪打窗心共碎，危樓望遠涕俱流。豈知
今日淮南路，亂絮飛花送客舟。

（注釋）石頭 城名，在南京市，漢西門北，頗占形勢。瓜洲 高宗紹興三十一年，金人

侵瓜洲，宋虞允文大破之於采石。芻蕘 詩：「詢於芻蕘」。此指張浚、黃中、

孫道夫等謂金必背盟，請早爲之備，時沈該、湯思退等在位，不以爲然。淮南路

宋淮南路分東西兩路，揚州屬東路。

樓上醉書

前人

丈夫不虛生世間，本意滅虜收河山；豈知蹭蹬不得意，八年梁益凋朱顏。三
更撫劍忽大叫，夢中奪得松亭關。中原機會嗟屢失，明日茵席留餘濟。益州官樓
海如海，我來解旗論日買。酒酣博簪信手爲，歡娛梟盧喝得采。牛背爛爛電目光
，狂殺自謂原非狂。故都九廟臣敢忘，祖宗神靈在帝旁。

（注釋）蹭蹬 失勢貌。八年梁益 放翁爲梁益別駕八年。松亭關 在熱河平泉縣內。

方輿記要：「自喜峯口而北一百二十里有故松亭關，遼金時代戍守處也」。潛涕流貌。鑿古圍棋法。梟盧擲骰戲。

獵罷夜飲示諸生

前人

客途孤憤只君知，不作兒曹怨別離。報國雖思包馬革，愛身未忍價羊皮。呼鷹小獵新霜後，彈劍長歌夜雨時。感慨却愁消壯志，倒瓶濁酒洗餘悲。

（注釋）包馬革 謂力戰而死，以馬革裹屍。價羊皮 昔百里奚爲楚人所執，秦穆公以五羊皮贖之，授之國政，遂成良相。

又書憤

前人

白髮蕭蕭臥澤中，祇憑天地鑑孤忠。阨窮蘇武餐氈久，憂憤張巡嚼齒空。細雨春燕上林苑，頽垣夜月洛陽宮。壯心未與年俱老，死去猶能作鬼雄！

（注釋）蘇武餐氈 蘇武使匈奴，留居海上，嚼雪吞氈。張巡嚼齒 張巡守睢陽，每戰大

呼，嚼齒皆碎，及尹子奇觀之，其齒存者，不過三四。上林苑 秦舊苑，漢武帝更增廣之，周袤三百里，離宮七十所。遺址在今陝西長安縣西。洛陽宮 洛陽爲宋室故都，故云。作鬼雄 屈原國殤：「子魂魄兮爲鬼雄」。

冬夜聞角聲 二首錄一

前人

嫋嫋清笳入雪雲，白頭老守臥中軍，自憐到死懷遺恨，不向居延塞外聞。

（注釋） 中軍 主將所帥之軍。居延塞 漢武帝使伏波將軍路博德築遮虜障於居延城，

一曰居延塞，在今甘肅張掖酒泉一帶。

十一月四日風雨大作

前人

僵臥孤村不自哀，尙思爲國戍輪臺，夜闌臥聽風吹雨，鐵馬冰河入夢來。

（注釋）輪臺 西域地名，在今新疆。夜闌 夜半也。

排悶

前人

四十從軍渭水邊，功名無命氣猶全。白頭爛醉東吳市，自拔長劍割疏肩。

〔注釋〕渭水 在陝西。 疏肩 劉邦與項羽鴻門之宴，樊噲入，項羽曰：「壯士！」與斗

卮酒，立而飲之；賜之彘肩，噲乃覆盾於地，加彘肩上，拔劍切而啗之。見史記項羽本紀。

書事

前人

關中父老望王師，想見壺漿滿路時。寂寞西溪衰草裏，斷碑猶有少陵詩。

〔解題〕杜少陵遭安史之亂，憂國傷時，放翁時代，危急尤過於唐，故有同感。

雜感

前人

一尊易致葡萄酒，萬里更登鸛鷓樓，何日羣胡遺種盡？關河形勝得重遊。

〔注釋〕尊 同樽，酒器也。 鸛鷓樓 在山西永濟，高三層，唐人題詩者甚衆。

追感往事

前人

諸公可歎善謀身，誤國當時豈一秦？不望夷吾出江左，新亭對泣亦無人。

（注釋）秦 指秦檜。夷吾 管仲字。管仲佐桓公，霸諸侯，匡天下。江左夷吾 晉溫

嶠稱王導爲江左夷吾。新亭 晉室南渡，建都金陵，公卿暇日，常至新亭宴會，

周顛曰：「風景不殊，舉目有山河之異！」王導曰：「當戮力神州，共獎王室，何

至作楚囚對泣？」

題海首座俠客像

前人

趙魏胡塵千丈長，遺民膏血飽豺狼。功名不遣斯人了，無奈和戎白面郎。

（注釋）白面郎 宋書：「欲伐國而與白面書生謀之，事何由濟？」

塞上曲 四首錄三

前人

將軍許國不懷歸，又見桑乾木葉飛。要識君王念征戍，新秋已報賜冬衣。

金鼓轟轟百里聲，繡旗寶馬照川明，王師仗義從天下，莫道南兵夜斫營。

老矣猶思萬里行，翩然上馬始身輕，玉關去路心如鐵，把酒何妨聽渭城？

（注釋）桑乾 河名，古之無定河今名永定河，在河北省境。 斫營 偷營也，王師乃征伐

之戰，不能謂之偷襲。 玉關 玉門關。 渭城 卽王維之陽關三疊：「渭城朝雨

挹輕塵，客舍青青柳色新，勸君更進一杯酒，西出陽關無故人。」

雪中忽起從戎之興

前人

羣胡束手仗天亡，棄甲縱橫滿戰場；雪上急追奔馬迹，官

軍夜半入遼陽。

（注釋）放翁有直搗遼陽之念，吾人將何時重入瀋陽城乎？

冬夜讀書有感

前人

胸中十萬宿貔貅，阜纛黃旗志未酬，莫笑蓬窗白頭客，時

來談笑取幽州。

（注釋）貔貅 猛獸，借以喻軍隊。 幽州 古九州之一，此指河北省境。

白露前一日已如深秋

匹馬曾防玉塞秋，豈知八十老漁舟，非無丈二爰堪請，只恐傍人笑白頭。

（注釋）玉塞 唐李益詩，有「走馬曾防玉塞秋」句。爰 音殊，古兵器之一，形似木棍。

追憶征西幕中舊事

四首錄二

前人

大散關頭北望秦，自期談笑掃胡塵，收身死向農桑社，何止明明兩世人！

憶昔王師戍隴回，遺民日夜望行台，不論夾道壺漿滿，洛筍河魴次第來。

（注釋）大散關 卽散關，在陝西寶雞，爲秦蜀往來要道。行台 行轅也。壺漿 孟子

：「簞食壺漿，以迎王師」。洛筍河魴 原注云：「在南鄭時，關中將吏有獻

此二物者」。

軍中雜歌

前人

三受降城無壅城，賊來殺盡始還營！
漠南漠北靜如掃，清夜不聞胡馬聲。

（注釋）受降城 唐張仁愿築三受降城：一在黃河東岸，一在西岸，一在北岸。

太息 三首錄一

前人

書生忠義與誰論？骨朽猶應此念存。
砥柱河流仙掌日，死前恨不見中原。

（注釋）仙掌 華嶽峯名。砥柱 黃河中有山名砥柱，又古語「中流砥柱」。

估客自蔡州來

前人

百戰元和取蔡州，如今胡馬飲淮流。
和親自古非長策，誰與朝家共此憂？

（注釋）百戰句 唐憲宗元和中，李愬討淮西，雪夜入蔡州。（今河南汝南。）和親以

漢女嫁外族，自漢婁敬倡始。

感事

前人

渭上書昏吹戰塵，橫戈慷慨欲忘身，東歸却作漁村老，自誤青春不怨人。

（解題）放翁曾參戎幕於關中，秋風渭水，大散關頭，嘗有躍馬橫戈之夢，其報國赤心，蓋至老不變。

讀范致能攬轡錄

前人

公卿有黨排宗澤，帷幄無人用岳飛；遺老不應知此恨，亦逢漢節解沾衣。

（解題）原題作「夜讀范至能攬轡錄，言中原父老見使者多揮涕感其事作絕句」。按范至能，名成大，宋吳縣人。隆興中使金，秉節盡忠，嘗有攬轡錄。

秋夜將曉出籬迎涼有感 一百錄一

前人

三萬里河東入海，五千仞嶽上摩天，遺民淚盡胡塵裏，南望王師又一年！

北望

前八

北望中原淚滿巾，黃旗空想渡河津，丈夫窮死出來事，要是江南有此人！

（解題）宋室南渡，朝野紛如，無恥者坐享偏安，狡賴者空言抵抗，放翁不忍使鄙薄江南無人，故刻苦自勵乃爾。

聞武均州報已復西京

前人

白髮將軍亦壯哉，西京昨夜捷書來！胡兒敢作千年計，天意甯知一日回。列聖仁恩深雨露，中興赦令疾風雷。懸知寒食朝陵使，驛路梨花處處開。

（解題）西京 北宋以洛陽爲西京。

冬夜不寐至四鼓起作此詩

前人

秦吳萬里車轍遍，重到故鄉如隔生。歲晚酒邊身老大，夜闌枕畔書縱橫。殘燈無燄穴鼠出，槁葉有聲村犬行。八十將

軍能滅虜，白頭書欲事功名

（注釋）秦吳句 放翁，越州山陰人。越州漢季爲孫吳地。孝宗初元自檢討官出判建康，尋改隆興，又皆吳地，後又改判夔州，王炎宣撫川陝，辟爲幹辦公事。陝故秦地，逮范成大帥蜀，又辟爲參議官。蜀在戰國爲秦所併，亦秦地也。宣曠所至，幾遍萬里故云。故鄉句 按放翁以孝宗隆興初元出判建康，輾轉遷徙，歷楚吳隴蜀，至光宗紹熙元年，始召遷禮部郎中，兼實錄院檢討官。逮甯宗嘉泰二年，詔同修國史實錄，免奉朝請，進祕書監，三年書成，升資章閣待制，歷三朝四十餘年，始致仕歸故里，故云。穴鼠 鼠，穴虫之總名。滅虜 謂滅金也。八十句 謂唐李勣也。勣本姓徐，名世勣，字懋功，佐高祖有功，賜姓李，封英國公。太宗卽位，避去世字。平竇建德，俘王世充，破劉黑闥、徐圓朗，拜并州都督，降突厥，破薛延陀。高宗立，進司空僕射，率兵討高麗，平其國爲郡縣，（時高麗有讖云：「當有八十老將平之，」李英國公實膺是讖。）卒贈太尉，諡貞武。

客去追記座中所言

前 人

征西幙罷幾經春，嘆息兒音尙帶秦。每爲後生談舊事，始

知老子是陳人。建隆乾德開王業，溫洛滎河壓虜塵。倘得此生重少壯，臨危敢愛不貲身。

（注釋）建隆 乾德 皆宋太祖建國年號。溫洛 皆河南黃河兩岸地。

示兒

前人

死去原知萬事空，但悲不見九州同。王師北定中原日，家祭無忘告乃翁！

（解題）放翁彌留易箦之頃，尙以國事爲念，悲夫！

（注釋）九州同 九州：荆揚雍豫徐梁青兗冀也。九州攸同。（見書禹貢）言宋自南渡後疆宇益狹也。中原 指今河南地，時爲金所有。

送曾繼先赴山陰路鈴

陳傅良

鬚髯白盡猶強餘，髀肉添多未跨鞍，不向胡沙親矢石，却來橋塚護衣冠。歸舟自此長相背，薦墨於今尙未乾。只恐

燕然他日事，獨無名字可同刊。

(注釋) 路鈞 官名。 鈞 俗做字。 橋塚句 謂橋山之塚，本黃帝陵。衣冠謂衣冠塚，

相傳黃帝升天，羣臣取其衣冠埋之爲塚。此指南宋越中陵墓。 薦墨 謂薦書。

燕然二句 謂不戰沙場，不能立功異域，如勒銘燕然也。

送張定叟尙書鎮襄陽

樓 鑰

公家忠獻公，助名照穹壤。南軒傳聖學，後進斗山仰。尙書天分高，百聞真朗朗。日坐四益堂，濡染助涵養。小出輒驚世，發譽自英蕩。兩朝倚才辦，三接承容獎。堂堂尹京手，風采漢張敞。九街寢桴鼓，終朝清訟牘。汗流化清溝，鬧市鋤巨駟，鈴齋晝無人，士友厚吾黨。政成化自行，談笑揮浩穰。皇家重闢寄，拊髀勞注想。頗牧起禁中，帝曰汝其往！人多惜公去，地位切台兩。惟公不擇地，引義猶慨慷。陬度更周詢，千里若尋丈。再拜受臨遣，因得進忠讜。邊臣因多事，備禦當素講。要須久其任，百弊隨剗斲。願假臣歲月，表裏如指掌。人才固不乏，第一戒欺罔。樸拙勝巧心，好佞寧木彊。願求忠直士，枉直謹誅賞，更須

寬轡策，奏請應如響。上問卿何先，安靜最爲上。上憂襄漢間，吳楚欠遮障。公固論形勢，袞袞到遜抗。是時晉在洛，武昌勢相向，是爲必爭地，南北謹提防。今雖居上游，事與古殊狀。狂寇縱欲來，無處可傳餉。况今三陲靜，皇靈方遠揚。與蜀相犄角，國勢自增壯。尙期效寸尺，才疏忽非廣。忠肝氣凜凜，秋旻足排蕩。上喜憂顧寬，趣行開玉帳。捐金示優寵，諭賜煩上相。惟公最得士，雖別俱惘惘。薦紳紛祖餞，直欲傾家釀。賦詩寫胸臆，一一成技癢。家聲與國事，負荷有餘量。邊頭十萬兵，公臨如挾纜。吾聞胡運窮，羣酋欲爭長。不戢將自焚，前轍有狂場。當爲不可勝，有和謹毋倡。千載羊叔子，制敵恢天網。行將友斯人，山川固無恙，備成撫機動，應煩護諸將。功高歸未晚，會見登炳亮。他時名父子，繼踵凌煙像。

（解題）張定叟 名杓，父汝，宋綿竹人。以父恩累官至袁衛二府，提舉湖北，常入奏事，孝宗甚喜，累遷戶部侍郎，端寧朝仕至端明學士，知建康府。杓天分高爽，吏材敏給，所治有能聲。

（注釋）忠獻公 謂張洙，宋高宗時，爲川陝京西諸路宣撫使，力拒金人。尋知樞密院。會

秦檜主和議，被貶，孝宗時，復督師江淮間，尋又罷兵，卒贈太師，忠諫其諡也。

南軒 謂張栻。栻，浚子，以古聖賢自期，與朱熹爲友，仕爲直祕閣，後開府治

戎。學者稱南軒先生。 斗山 謂秦山北斗，人所瞻仰者。 蕩 音蕩，大竹也。

張敞 漢宣帝時京兆尹，擊鼓稀鳴，市無偷盜；然無威儀，又爲婦畫眉。 訟婦

猶言詞訟，婦、音后。漢趙廣漢爲潁川太守，教民爲誦畜，以受民之詞訟。 駟

謂市井間牙儉之狡詭者。 鈴齋 猶言鈴閣，謂將帥所居之地，鈴通作輪。 浩

積 浩、大也；積、盛也；謂人衆多也。 撫髀 劉備故事。 頗牧 謂廉頗李牧

，均戰國時趙之名將。 臺兩 喻大臣也。 陳度 阪、隅也；度、量度也。「陳

度」與「周詢」對言。 遜抗 謂陸遜，陸抗父子，爲吳名將。 不戢 左傳：「

夫兵猶火也，不戢將自焚」。 狂揚 不詳。 羊叔子 謂羊祜，晉武時鎮襄陽，

與陸抗對境，綏懷遠近，深得民心。 弼亮 猶言輔佐。 凌烟 謂凌烟閣，唐太

宗圖功臣像於上。

讀王建射虎行

范浚

我讀射虎行，感慨興長歎。官差射虎得虎難，山下遠立常空還。惜留猛虎著

山裏，射殺顧恐終身閑。有如邊將圖偷安，遵養時晦容其奸。翻愁努力盡高鳥，良弓挂壁無由彎。君不見，劉容臣，高千里，留賊自資媒富貴，恐賊盡誅身不利。坐令屈律喪頭人，橫報九州狂螻蝻。嗟嗟忠臣心不移，受刀摩頸甘如飴。紛紛血刃勇不顧，一死未謝君王知。官軍壯志吞蠻夷，匈奴不滅寧家爲！相公誓欲平淮西，慨言賊在歸無期。霍公裴令今已矣，我泣射虎徒歎歎！

（注釋）遵養時晦 遵，循也；言退自循養，與時皆晦。見詩經。高鳥良弓 史記淮陰侯

列傳：「狡兔死，走狗烹；飛鳥盡，良弓藏；敵國破，謀臣亡；天下已定，我固當烹。」劉巨容 唐徐州人，僖宗時爲節度使，大破賊衆，或勸窮追，巨容曰：「

國家喜負人，有急則撫有將士，不愛官賞；事甯則棄之，或更得罪，不若留賊以爲富貴之資」，賊勢復熾。高千里 名駢，唐幽州人。僖宗時節度使，部將張璠受

黃巢金，爲巢請降。時友軍皆至淮南，駢恐分功，乃奏賊不日當平，不煩諸道兵，請悉遣歸，朝廷許之，巢知諸道兵已北渡，乃告絕於駢，且請戰，駢令張璠出擊，

兵敗死，巢勢復振。平淮西句 唐憲宗時，淮西節度使嗣子吳元濟作亂，數年不

克，羣臣請罷兵，裴度獨言淮西心腹之患，不可不除。遂拜度爲宣慰使，卒平淮西

之亂 雀公 增復共

盱眙北望

戴復古

北望茫茫渺渺間，鳥飛不盡又飛還，難禁滿目中原淚，
莫上都梁第一山！

（注釋）都梁 山名，在安徽盱眙東南五十里，上有隋煬帝所建都梁宮，今廢。

江陰望浮遠堂

前人

橫岡下瞰大江流，浮遠堂前萬里愁。最苦無山遮望眼，
淮南極目盡神州。

（解題）江陰 屬今江蘇，時淮南土地，已非宋有。

釣臺

前人

萬事無心一釣竿，三公不換此江山。平生誤識劉文叔，
惹起虛名滿世間。

（注釋）劉文叔 漢光武帝劉秀字。

讀真德秀疏

前人

禁城雞唱金門開，起居舍人携疏來，榻前一奏一萬字，歷歷寫出忠義懷：「頓首惶恐臣昧死，越祿敢言天下事。百年河洛行胡朔，恨滿東南天一角；夷甫諸人責未酬，志士愁眠劍鋒落。天意未回事難舉，鄉來一試成千誤；犬羊頻歲自相屠，衰盛大抵由天數，昨臣銜命出疆時，自期有去必無歸，屈膝穹廡當憤死，天相孤忠半道回。金山之下長江水，擊楫中流書壯志，東風吹上妙高台，略望江淮見形勢。形勢從來祇如此，幾年待得天時至，朝廷爲計保萬全，往往忘却前朝恥。臣今未暇論規恢，胡虜已亡何慮哉？中原曠地無人管，正恐英雄生草萊。北方苦飢民骨立，萬一束來竊吾粟，邊頭諸州無鐵壁，借問誰能備倉卒？請朝廷，厲精兵，擇良將，辦多多，策上上，更選人材老練通達，分守要衝講明方略。一賢可作萬里城，一人可當百萬兵，坐令國勢九重鼎，所賴君心一點明」。長牋奏徹龍顏悅，繼言「臣愚進此說，言雖甚鄙用甚切，宸斷必行天下福。勿謂儒生論迂闊，臣之肝膽與人別，讀書豈爲文章設？王師若出定中原，玉堂敢草平羌策」。

(解題) 衍字，字元九，號子真，學士。歷官至參知政事，直學直學。

謚文忠，從祀孔廟。著有文章正宗，西山文集。本題爲編者所擬，原題爲：「嘉定甲戌孟秋二十有七，起居舍人，兼直學士院真德秀，上殿前奏邊事，不顧忌諱，一疏萬言，援引古今，鋪陳方略，忠諫感激，辭章浩瀚，誠有補於國家。天台戴復古獲見此疏，伏讀再三，竊有所感，敬效白樂天體以紀其事，錄於野史。」

(注釋) 夷市 晉王衍字，衍有盛才，明悟如神，名傾當世，惟以清談爲事，口中雌黃，朝

野翕然，謂之一世壻門。犬羊句 謂金元互相攻伐，金勢日蹙。金山 在江蘇鎮江西北。妙高台 在金山絕頂，形勝第一。玉堂 官署名，侍中所居。

挽疊山先生

洪咨夔

千古精忠日月光，恨無麟筆寫堂堂。還家恥作梁江總，辟穀誰知韓子房。後死十年應有待，輕生萬里故非狂。有兒可拾江邊骨，須信人亡道不亡。

(解題) 疊山，謝枋得號，宋弋陽人。爲人豪爽，以忠義自任。元兵至信州，疊山變姓名入

山中，麻衣野屨，日東嚔哭。及宋亡，居闕，參政魏天祐強之北行，至燕遂不食死，門人私謚曰：文節先生。

（注釋）麟筆。猶言春秋之筆。江總。仕梁爲太子舍人，入陳爲太子詹事，與後主荒宴；

隋初，復拜上開府。子房。謂張良，良故韓臣，佐漢高祖成帝業，晚好黃老，習

神仙辟穀之術，從赤松子游以終。

拜卞忠貞墓

周洎

晉鼎斃魂姦人窺，孰謀國者如兒嬉。陷窞弗設延虎貔，號闕搏噬嬰者摧，羣公奔潰不敢誰。卞公力疾起督師，謂事迫矣奚生爲？以肉餒虎吁可悲！公則死矣二子隨。偉哉忠孝萃一時，維公忠義天所資，向來謀國如著龜，不用吾言至於斯，爲社稷死則死之。治城之麓江之湄，荒冢突兀餘豐碑。半生讀史長歔歔，拜公之墓涕霑頤，死者可作吾誰歸！嗟哉江左固多士，往往所欠惟一死，元規兒輩何足罪，王公偪仄石頭裏，氣息奄奄有如泉下鬼，蘇武之節不如是，視公胡不類有泚，男子之死一言耳，死而不亡公父子。

（解題）卞章，字望之，晉宛句人。永嘉中爲著作郎，成帝立，太后臨朝，蘇峻反，章以尚

書命，都督諸軍拒之，軍敗，力突戰死，二子珍許同時遇害。謚忠貞，墓在金陵冶城。

（注釋）輓旒 不安貌。號鬪句 號，虎怒鳴；鬪，虎聲；搏，擊也；噬，嚙也；嬰，當也；喻勇士奮怒如虎。善輻 古占卜具，喻謀國有先見，如善龜之示兆。元規 晉庾亮字。王公 疑指晉王導。頰有泚 猶言慚愧汗顏。

博浪沙

陳孚

一擊軍中膽氣豪，祖龍社稷已驚搖。如何十二金人外，猶有人間鐵未銷？

（解題）博浪沙 張良爲韓報仇，使力士爲鐵錐，狙擊秦始皇於博浪沙中，誤中副車。故址在今河南博浪縣東南。

（注釋）祖龍 指始皇，秦使者從關東過華陰，有人遮使者曰：今年祖龍死。使者以聞。始皇默然良久曰：山鬼固不過知一歲事；踰年，始皇崩。十二金人 始皇收天下之兵，聚之咸陽，銷鋒鏑，鑄以爲金人十二。

書凡上

趙卯發

國不可背，城不可降！夫婦同死，節義成雙。

陶山十詠和鄧牧心

林景熙

晴峯無數蘸清流，窈窕寒生六月秋。百鍊不須歐冶劍，沼
吳人在采蓮舟。

（解題）陶山 在紹興縣南，以陶貞白嘗隱居於此，故名。鄧牧心 名牧，洞霄宮高士。
（注釋）歐冶 春秋時善鑄劍者。

秦望山

前人

鐫石奇功席卷來，眼中滄海一瓊杯，神山只在靈鼇背，徐
福樓船不見回。

（解題）秦望山 在今嵊縣，秦始皇登山望海處，故名。
（注釋）徐福 始皇使徐福，發童男女各五百人，載樓船入海不還。

題陸放翁詩卷後

前人

天寶詩人詩有史，杜鵑再拜淚如水；龜堂一老旗鼓雄，勁氣往往摩其壘。輕裘駿馬成都花，冰甌雪椀建溪茶，承平糜節半海寓，歸來鏡曲盟鷗沙。詩墨淋漓不負酒，但恨未飲月氏首，牀頭孤劍空有聲，坐看中原落人手！青山一髮愁濛濛，干戈已滿天南東！來孫却見九州同，家祭如何告乃翁？

（注釋）天寶詩人 指杜甫，世稱杜甫爲詩史，此比陸游。 杜鵑 以喻帝王。傳古蜀帝名

杜宇，死化爲鳥，名杜鵑。 龜堂 陸游所居堂名，晚號龜堂。 建溪 閩江北源

。 鏡曲 謂鏡湖之曲。 月氏 讀如肉支，古國名，此處泛指胡人。 來孫 玄

孫之子。

閩家則堂大參歸自北寄呈 并序

前人

丙子春，伯顏兵至杭州，則堂家鉉翁以參知政事與丞相吳堅等充祈請使詣燕，申祈請之議。國亡，守志不仕，貶河中府十九載，至元三十一年甲午召還放自便，乃歸江南，時年八十有二矣。

濱死孤城雪滿顛，冰氈盡偶生全，衣冠萬里風塵老，名
節千年日月懸！清唳秋荒遼海鶴，古魏春冷蜀山鶻。歸來親
舊驚相問，禾黍離離夕照邊。

（解題）河中府 今山西永甯縣。 至元 元世祖年號。

（注釋）遼海鶴，漢遼東人丁令威，學道於靈虛山，後傳化鶴歸遼。 禾黍離離 詩經：「

彼黍離離」，憫西周之顛覆也。

夢中作四首

前人

珠亡忽震蛟龍睡，軒敞甯忘犬馬情，親拾寒瓊出幽草，四山風雨鬼神驚。
一杯自築珠丘土，雙匣猶傳竺國經。獨有春風知此意，年年杜宇泣冬青。
昭陵玉匣走天涯，金粟堆前幾莫鴉。水到蘭亭轉嗚咽，不知真帖落誰家。
珠島王鴈又成埃，斑竹臨江首重回。猶憶年時寒食祭，天家一騎捧香來。

（解題）原注云：元兵破宋，河西僧楊勝吉祥，行軍有功，因得於杭置江淮諸路釋教都總統，所以管轄僧人，時號楊總統。盡發越上宋諸帝山陵，取其骨渡浙江，築塔於宋內

朝舊址，其餘骸骨，棄草莽中，人莫敢收。適先生與同舍生鄭樸翁等數人在越上，痛憤，乃不能已；遂相率爲採藥者，至陵上以草囊拾而收之。又聞理宗齟骨爲北軍投湖水中，因以錢購漁者求之，幸一網而得，乃盛二函，託言佛經，葬於越山，且植冬青樹識之。會元時作詩，不敢明言其事，但以夢中作爲題。

（注釋）第一首言諸陵被發，舊臣不能忘情，故爲拾骨改瘞。珠丘 舜葬蒼梧，有鳥銜青砂珠，積成壟，名曰珠丘。雙匣 猶言二函。冬青 一名貞木，又名萬年枝。金粟山 唐明皇葬處，此喻帝陵。

冬青花

前人

冬青花，花時一日腸九折，隔江風雨濤影空，五月深山護微雪。石根雲氣龍所藏，尋常螻蟻不敢穴。移來此種非人間，曾識萬年觴底月。蜀魂飛遶白鳥臣，夜半一聲山竹裂。

（注釋）隔江句 原注：「謂冬青之在宮中者」。五月句 原注：「言在紹興陵上者，冬青開於五月，其色白而微黃」。石根句 原注：「謂天子所葬之處，尋常臣民，

，不得雜處也。」蜀魂句 古傳杜鵑爲蜀帝所化，故名。夜半句 杜甫詩：「

子規夜啼山竹裂，子規卽杜鵑也。

太學同舍徐應鑣，誓義沈井，後十年，衆爲營墓立碑，私諡正節先生。

前人

高名不與魄俱沈，魚腹孤忠耿至今。翠碣已書身後諡，寒泉猶照死時心。神游舊日山河改，夢斷疎槐風雨深。埋骨誓終從武穆，棲霞嶺樹隔秋陰。

（解題）見前何夢桂挽太學正節先生徐應鑣詩注。

拜岳王墓

前人

寥落一抔土，英雄萬古冤。孤忠貫日月，遺恨寄中原。樹老殘霞澹，塵深斷碣昏。東南天半壁，往事泣寒猿。

（解題）岳王墓在西湖棲霞嶺山麓。

讀文山集

前人

黑風夜撼天柱折，萬里飛塵九溟竭，誰欲扶之兩腕絕，英淚瀾瀾滿襟血。龍庭戈鋌爛如雪，孤臣生死早已決，綱常萬古縣日月，百年身世輕一髮。苦寒尙握蘇武節，垂盡猶存杲卿舌。膝不可下頭可截，白日不照吾忠切。哀鴻上訴天欲裂，一編千載虹光發。書生倚劍歌激烈，萬壑秋聲助幽咽。世間淚灑兒女別，大丈夫心一寸鐵。

（注釋）黑風 北風也。龍庭 謂匈奴之王庭，此指元朝。杲卿舌 謂唐常山太守顏杲

卿城陷被執，罵賊斷舌事。

題陸秀夫遺像

前人

紫宸黃閣共樓船，海氣昏昏日月偏，平地已無行在所，丹心猶數中興年。生藏魚腹不見水，死抱龍髯直上天，板蕩純臣有如此，流芳千古更無前！

（解題）陸秀夫 宋末江蘇鹽城人，負帝昺至崖山投海死。

（注釋）紫宸黃閣 紫宸 唐宮殿名，借稱宋衛王。黃閣，丞相聽事門曰黃閣，因以黃閣

稱丞相，指陸秀夫。板蕩 謂亂世也。

讀張巡傳

周權

我懷張睢陽，厲節剛不吐；妖氛暗禹縣，奮迅提虎旅，憑城發裂眦，忠勇激肺腑，擐甲四百戰，奇功不可數！江淮卒保障，藉此奠唐土。可憐將孤軍，機勢已莫禦，食盡兵亦窮，愛妾入鼎釜。雷南空桓桓，餘勇不可賈，身城遂俱亡，大義著君父。人孰不能守？公守以死拒；人孰不有死？公死乃其所。繁霜表貞松，迅水知砥柱；當時偷生輩，澳泐猶妾婦。青燈撫遺編，英氣凜千古！

（解題）安祿山反，張巡與太守許遠合兵守睢陽，（故城在今河南商邱縣南）死拒數月，食盡援絕，城陷被執，大罵遇害。故後世常稱張巡曰張睢陽。

（注釋）禹縣 謂中國。虎旅 卽兵隊。裂眦 髮指眦裂，謂盛怒狀。擐 音關，貫也。愛妾入鼎釜 巡守睢陽，被圍數月，食盡，殺愛妾以饗士。雷南 指雷萬春、南霽雲，皆巡部驍將，與巡同爲賊將尹子奇所害。桓桓 武貌。砥柱 一作底柱，山名，在河水中，故曰中流砥柱。澳泐 音腆然，垢濁也，

天馬

鮑 輓

天馬抱奇相，緊骨瞳方明，出入百萬中，有如一鳥輕。宇宙莽超蹈，風雲慘經營。獨倚雄傑態，蕭蕭隨北征。朝飲南海頭，夕秣乃幽并。天主坐黯淡，別羣奮長鳴。豈無輕俠兒，金羈懸朱纓？但感東帛義，不忍負死生。低頭爲君老，暗暗萬里情。

（注釋）幽并 古九州之地。 東帛 古聘問禮。

岳鄂王墓

趙孟頫

鄂王墓上草離離，秋日荒涼石獸危。南渡君臣輕社稷，
中原父老望旌旗。英雄已死嗟何及，天下中分遂不支。莫向
西湖歌此曲，水光山色不勝悲！

（解題）宋孝宗時，追封岳飛爲鄂王，諡武穆，後改諡忠武。墓在今杭臨西湖棲霞嶺下。此詩持論平允，造句警鍊，詠鄂王詩，允推獨步。

（注釋）離離 紛披繁盛貌。 石獸 卽石馬石象之類，列於墓前者。

悼文丞相

潘音

回首中原已陸沉，捐軀朔漠氣蕭森。恐吹餘燼成炎火，未許黃冠返故林。社稷忽生千古色，綱常無忝百年心。總拚清骨榮荒草，不復胡沙掩素襟。

（注釋）恐吹句 謂元如釋文山回南，必將再圖興復。按王積翁等見文山不屈，欲請釋爲道士，留夢炎不可，曰：「天祥出，復號召江南，置吾輩於何地！」事遂寢。

挽太學正節先生徐應鑣

何夢桂

國破君亡一死宜，絕憐兒女死如飴。龍池竟負媯皇誓，蛙坎空遺烈士悲。洗骨不污唐六館，瀝心無愧趙孤兒。此行多少生還客，休向梯雲讀墓碑。

（解題）徐應鑣，字巨翁，宋江山人。咸淳末試補太學生，宋亡，三學生皆從入燕，應鑣誓不降。作文祭岳飛祠，長子琦亦賦詩自誓畢，并幼子崧，女元娘，縱火自焚，諸僕

驚救拔滅，父子皆被殺。次日，亦同投水死，同舍生哀之，以盆曰王節生，

(注釋)龍池 喻所投死之水。蛙坎 亦喻池水。六館 唐代處士子之館。趙孤兒

謂趙朔子武也。梯雲 當是應鑣葬處地名。

湖州歌二十二首錄四

汪元量

鐵甕城頭馬亂嘶，金陵山下砲如飛。黑風卷地鼓鼙急，昨夜常州又受圍！

一半淮江半浙江，怒潮日夜自相撞。揚州昨夜軍書至，說道淮安未肯降。

北望燕雲不盡頭，大江東去水悠悠。夕陽一片寒鴉外，目斷東西四百州。

太皇太后過江都，遙指淮山是畫圖。拋却故家風雨外，夜來歸夢遶西湖。

(注釋)鐵甕城 古京口，今鎮江。淮江 卽淮河。太皇、太后 指徽宗帝后，欽宗靖

康二年，金人以二帝及后妃太子宗戚三千人北去。

越州歌 八首錄二

前人

一陣西風滿地烟，千軍萬馬浙江邊，官司把斷西興渡，

要奪漁船作戰船。

魯港當年傀儡場，六軍盡笑賈平章。三聲鑼響三更後，
不見人呼大魏王。

（注釋）西興渡 在蕭山南，爲古吳越要津。魯港 一名魯江，在安徽蕪湖縣西入江。

賈平章 指賈似道以太師平章軍國事；宋德祐元年，元兵克池州，賈似道率師次魯港，爲元兵所敗。

錢塘歌

前人

西塞山邊日落處，北關門外雨來天。南人墮淚北人笑，
臣甫低頭拜杜鵑。

（解題）一本題作送琴師毛敏仲北行。

（注釋）北關門 元兵由北門入杭。臣甫句 用杜甫杜鵑詩意。

答方石田

前人

南朝千古傷心事，每閱陳編淚滿襟。我更傷心成野史，
人看野史更傷心！

(解題) 南朝多降主，如孫皓、李煜等，陳編所紀，讀之心傷。

題王導像

前人

秦淮浪白蔣山青，西望神州草木腥，江左夷吾甘半壁，
只緣無淚灑新亭。

(解題) 王導晉人，溫嶠見王導喜曰：「江左有管夷吾，吾復何慮哉！」

(注釋) 蔣山 卽鍾山，以蔣子青爲山神，故名，與秦淮河并在今首都。新亭 今江甯縣

南，一曰勞勞亭。

居延

前人

憶昔蘇子卿，持節入異域。淹留十九年，風霜毒顏色。嚙氈曾牧羝，跣足步
沙蹟。日夕思漢君，恨不生羽翼。一朝天氣清，持篇入漢國。胤子生別離，回視
如堆礫。丈夫抱赤心，安肯淚沾臆！

(注釋) 蘇子卿 蘇武字。漢武帝時，使匈奴，被留，居海上，嚙雪吞氈，仗節牧羝，凡十

九年始還。胤子 嗣子也。

北師駐皋亭山

前人

錢塘江上雨初乾，風入端門陣陣酸。
萬馬亂嘶臨警蹕，三宮垂淚濕鈴鑿！
童兒賸遣追徐福，厲鬼終當滅賀蘭！
若說和親能活國，嬋娟應是嫁呼韓。

（解題）一本作元兵平杭日詩

（注釋）童兒句 時揚駙馬送二王出奔，由浙入閩，句當指兵追二王事。賀蘭 謂賀蘭進明，「厲鬼」本張巡語，此處合用。和親句 時元人索宮女

醉歌 六首錄二

前人

湧金門外雨晴初，多少紅船上下趨，
龍管鳳簫無韻調，却搥戰鼓下西湖。

伯顏丞相呂將軍，收了江南不殺人，
昨日太皇請茶飯，滿朝朱紫盡降臣。

(注釋)湧金門 杭州城門。搥 音戈，擊也。伯顏 元蒙古人，流漢有謀略，世祖時

官至中書丞相，行軍有紀律，東南之侵，伯顏之力爲多。收了句 元人屠殺漢人

極多，伯顏一人屠城二百，忽必烈即位中土前，屠殺一千八百四十七萬有奇。太

皇 卽謝太后。朱紫 古貴者之服色也。

館娃宮

尹廷高

金繡鴛鴦絲錦裯，水精簾底淨無塵，君王醉枕香紅軟，
人隔重江正臥薪。

(解題)吳王夫差，作宮以館西施，吳人謂美女曰娃，故曰館娃。遺址在今吳縣西南靈岩山
上。

(注釋)臥薪 謂越王勾踐。

獨松節士歌并引

楊維禎

獨松節士者，富春古先至馮驥也，什宋爲大理寺丞，淳祐初，守獨松關，大軍壓關，主將
有賣降者，獨節士殉關以死，炳然已列史傳。其孫士膺，出節士讀書所來青樓卷求題，爲賦獨

松節七歌。

獨松託根國西戶，千載風雲據龍虎。大樹將軍之子孫，特立東南天一柱。疾雷夜破釣魚台，黃鬚鐵甲連山來，獨松節士真柱石，一力當關萬莫開。虎毛將士獻地圖，津頭相國來乘桴。獨松未折重趙鼎，鐵甕已破差胡膜。白頭老父話往轍，地險由來重人傑。我欲關頭問獨松，獨松已殉烏號弓！來青書屋江之東，五雲繞屋光如虹。

（解題）富春 山名，在桐廬縣西，臨富春江。大理寺丞 官名。大理寺 掌刑法之官，爲九寺之一。丞，佐貳官也。淳祐 宋理宗年號。獨松關 在餘杭西北獨松嶺上，爲皖浙要隘。

（注釋）大樹將軍 後漢馮異坐大樹下，不與諸將爭功，時稱大樹將軍。釣魚台 漢嚴子陵釣台，烏號弓 良弓也。

昭君曲

前 人

胡月生西彎，明妃西嫁幾時還？不見單于謁金陸，但見邊

烽馳玉關。將軍漢家高築壇，身騎烏龍虎豹顏，何時去奪胭脂山？嗚呼！何時去奪胭脂山？

（解題）昭君 卽王昭君，漢元帝宮女，名嬙，後以賜呼韓邪單于，入胡爲閼氏。晉時避司馬昭諱，稱爲明妃。玉關 卽玉門關，在甘肅敦煌縣陽關西北，爲古西域大道。

龍 馬八尺以上爲龍。胭脂山 卽焉支山或燕支山，在甘肅山丹縣東。

花門行

前人

大唐宇宙非金甌，黃頭奚兒蟆作虬，跳梁河隴翻九土，驚呼夜半呼延秋。朔方健兒袖雙手，戰馬傷春舞楊柳，當時天驕不借兵，渭闕黃旗仆來久。快哉健鶻隨手招，渡河萬匹疾如猋，白羽若月筋箠驕，彎弓仰天落胡旄。吁嗟健鶻有如許，邀我索花固其所！明年西下崆峒兵，壯士重憂折天柱。折天柱，唐無人，引狼噬虎狼非麟，空令漢女嫁非匹，穹廬夜夜愁寒雲。

（解題）唐安祿山叛，回紇請發兵助討，肅宗然之，卒潰賊兵。及史思明復亂，回紇則請公主通婚媾，此詩卽詠其事。

(注釋)金甌 喻疆土之完固。黃頭奚 黃頭部奚部均爲東胡部落，祿山反，黃頭、奚、契丹、寶韋、曳落河(回紇語健兒之意)之衆，號父子軍。白羽筋箠 均箭名，箠音釋。旄 謂旄頭，胡星也。明年句 乾元二年，史思明西陷洛陽。瘡音翳，殺之也。

題段將軍征羌圖

宋 濂

西域都護多男兒，護羌校尉仍出師。生羌八種來寇塞，白劍欲接雙龍飛，凡亭山上血漂杵，奢延澤中鬼應語。至今有花皆成丹，疑是當年血未乾。

(解題)段將軍名頴，後漢桓帝時護羌校尉，破羌寇有功，進太尉。

(注釋)生羌句 桓帝延熹二年，八種生羌寇隴西金城塞，段頴擊破之，斬其酋豪以下二千級，獲生口萬餘。血漂杵 血流漂杵杵，言殺戮之甚。奢延澤 在今綏境內，靈帝建甯元年，段頴曾大破羌人於此。

陸秀夫像贊

前人



身抱龍髯兮眼不見水，鳳闕雖逕兮龍堂則邈。玉雪皜如兮

肯污泥滓？赤日出海兮爾心不死。

（注釋） 鳳闕 宮殿之泛稱。

題李陵見蘇武圖

劉基

中原無書羝不乳，狐裘蒙茸奈何許！老身漢節死生俱，地
角天涯見明主。金鞍駿馬見故人，相看一笑增悲辛。悲來風
沙吹上馬，河水東流日西下。

（注釋）羝不乳 羝爲公羊，不生乳。漢書蘇武傳：「匈奴徙武北海無人處，使牧羝，羝

乳乃得歸。」蒙茸 一作蒙戎，老茸。節 符節，使臣執以示信之物。蘇武牧

羊，杖漢節，臥起操持，節旄盡落。

悼文山

胡奎

裂指西風感別離，乾坤人物太奇奇，生爲孝子忠臣勸，死

有皇天后土知。萬折江流魚腹石，千年人立首陽碑。一門史氏春秋筆，愁把湖光入畫時，

（解題）文山 宋文天祥字。

（注釋）萬折句 以文山喻諸葛，魚腹石謂八陣圖。千年句 以伯夷叔齊餓死首陽山爲喻。

征夫詞

劉績

征夫語征婦，生死不可知，欲慰泉下魂，但視襖中兒！

（注釋）襖 襖襖，小兒衣被也。

征婦詞

前人

征婦語征夫，有身當殉國，君爲塞上土，妾作山頭石！

（解題）吳興王文濡曰：「不作尋常兒女子態，此等詩惜不多見，可以喚起幾許愛國魂。」

（注釋）山頭石 武昌北山有石，狀如人立。相傳昔有貞婦，其夫從役，遠赴國難，婦攜子

餞送於此山，立望而死，形化爲石。

雙廟辭

張憲

睢陽戰役血漂杵，力屈猶思爲厲鬼。玄元祠前哭一聲，
朝食愛妾暮羅鼠。唐家宮殿秋草生，二十一陵如掌平。獨遺
雙廟門前石，日有行人來繫牲。

（解題）唐張巡、許遠合兵守睢陽（今河南歸德）以抗安祿山兵，累戰皆克。食盡，殺愛妾以饗士，城陷，爲賊所殺。後人立廟睢陽，歲時致祭，號雙廟。

（注釋）玄元祠 唐奉老子爲始祖，尊曰玄元皇帝。二十一陵 唐代歷朝二十帝，此指二十一陵，恐有誤？

崖山行

前人

三宮銜壁國步絕，燭天炎火隨風滅。間關海道續螢光，力戰崖山猶一決。午潮樂作兵合圍，一字舟崩遂不支。檣旗倒仆百官散，十萬健兒浮血屍。皇天不遺一塊肉，一瓣香焚海州覆，猶有孤臣臥小樓，南面從容就刑戮。

（解題）南宋既覆，元軍更進取閩廣。張士傑、陸秀夫共佐衛王，駐兵崖山，朝夕力戰，終爲元兵所破。秀夫負帝昺赴海死，士傑欲復求趙氏後，別圖恢復，舟覆亦死。

（注釋）崖山 在今廣東新會縣南大海中，一百崖山門，陸秀夫負帝昺於此蹈海死。 閩關

艱澀之義，狀道路之難行。 一塊肉 楊太后聞帝昺死，撫膺大慟曰：「吾忍死聞

關至此者，正爲趙氏一塊肉耳，今無望矣！」遂赴海死。

戍婦吟

劉仁本

將軍功未成，持牛勞軍士。將軍豈無家？爲妾語夫主：
「勿爲賤妾生，甯爲將軍死！賤妾欲從之，軍中無女子！」

感懷

朱希晦

自歎頽然一老翁，十年奔走鬢飛蓬。中原虎鬥干戈滿，
四海人憂杼軸空。葛亮平生恢復計，汾陽材略中興功。何當
遠望春陵郭，佳氣朝來正鬱葱。

（注釋）飛蓬 詩經：「首如飛蓬」。 杼軸 織具，詩經：「杼柚其空」，通作杼軸。

葛亮 指諸葛亮，亮六出祁山，志復中原。 汾陽 指郭子儀，子儀平安史之亂，

唐室中興。 春陵 地名，今湖南甯遠縣西北，南陽亦稱春陵。

咏犬

于謙

報主有恩當食肉，却啣枯骨惱飢腸，於今多少閒狼虎，無益生民更食羊。

石灰

前人

千錐萬鑿出深山，烈火坑中走一番，粉骨碎身都不惜，要留清白在人間。

（解題）忠肅忠貞大節，死負沈寃，此詩自述之詞，亦可覘其襟抱矣。

出塞

前人

健兒馬上吹胡笳，旌旗五色如雲霞，紫髯將軍掛金印，意氣直吞瓦刺家。瓦刺窮胡真犬豕，敢向邊疆撓赤子？狼貪鼠竊去復來，不解偷生求速死。將軍出塞整戎行，十萬戈矛映雪霜，左將纔看收部落，前軍又報縛戎王。羽書奏捷上神州，喜動天顏寵數優。不願千金萬戶侯，凱歌但願早回頭。

（注釋）金印 漢置大將軍、驃騎將軍、車騎將軍、衛將軍、前後左右將軍，皆金印紫綬。

瓦剌 種族名，至也先最強，領有漠南北。赤子 喻人民，羽書 以木簡爲書，長尺二寸，有急事，則加以鳥羽插之。

秦寡婦良玉

張甯

卸卻金釵佩虎符，提兵十萬上皇都，西南夷婦援東土，
愧煞中原無丈夫！

龕山凱歌 四首錄二

徐渭

短劍隨鎗暮合圍，寒風吹血着人飛；朝來道上看歸騎，
一片紅冰冷鐵衣。

無首有身祇自猜，左啼魂魄右啼骸。憑將老譯傳番語，
此地他生敢再來？

（解題）龕山 在今蕭山。明代倭寇侵擾沿海各地，經戚繼光俞大猷勦平。

宴游爛柯山 三首

前人

萬山松柏遶旌旗，少保南征暫駐師；
接得羽書知賊破，爛柯山下正圍棋。

偏裨結束佩刀弓，道上逢迎抹首紅。
夜雪不勞元帥入，先擒賊將出洄中。

羣兇萬隊一時平，滄海無波嶺瘴清。
帳下共推擒虎將，江南只數義烏兵。

(解題) 爛柯山 在今衢縣。晉王質入山採樵，見兩人對棋，及局終，返視其斧柯已爛。

(注釋) 少保 指戚繼光。繼光南征倭寇，總督胡宗憲宴之，幕客作凱歌以頌。 偏裨 副也。 抹首 以巾縈首。 洄中 在河南蔡州，唐代淮蔡叛亂，李愬雪夜破蔡州。

擒虎將 指韓擒虎。隋文帝時，擒虎以輕騎五百，直取金陵，執陳後主。 義烏 兵 義烏，浙江縣名。戚繼光自練義烏新兵，百戰百勝。

關西老將歌

鄭國賓

少年騎馬疾如飛，長弓勁箭突重圍。
萬乘曾推雙轂送，五侯拊讓平交歸。
瀚

海黃沙連朔漠，天山月白開邊柝。一身轉戰三千里，陰風颯颯陣雲惡。奮臂前驅斷月支，橫行又奪胡馬騎，雕戈白日明秋漢，大漠霜高響鐵蹄。塞下人傳都護老，軍前共說長城固。豈知歲月漸蹉跎，老大逢人不相顧。射虎將軍竟不侯，牧羝歸來空白頭。聞說燉煌徵猛士，關西老將淚先流。

（注釋）射虎將軍 謂漢李廣，廣數奇，未能封侯。 牧羝句 謂漢蘇武牧羊海上十九年，歸國後，功大爵微，故云空白頭。 燉煌 在今甘肅。

凱歌一首

沈明臣

銜枚夜度五千兵，密領軍符號令明，狹巷短兵相接處，殺人如草不聞聲。

（解題）明臣曾作鏜歌十章，此首最佳，主帥胡宗憲爲之刻石。

（注釋）銜枚 枚，狀如箸，橫銜口中，所以禁喧囂也。 軍符 古行軍所用，剖竹爲之，以調遣兵士。 短兵 刀劍之屬爲短兵。

臨終題案

趙天生

書生不律難驅敵，何處秦庭可借兵？只有東津橋下水，西流直接汨羅清。

（解題）明亡，天生題詩於案，躍入江中，漁人救之，昇還，自餓死。

（注釋）不律，箠也。秦庭，春秋楚臣申包胥，向秦乞兵，哭泣於秦庭，勺漿不入口者七

晝夜。東津橋，在甯波。汨羅，江名，楚屈原自沈汨羅，作者爲明諸生，國亡

欲投水死故云。

絕命辭

陳良謨

中天懸日月，四海所畢照，倏爾陰霧昏，日月失常道。大夫百執事，其誰忘明君？愧予沈疴久，牀第淹數旬。背城孰盡瘁？巷戰杳無聲。如何社稷靈，順民爭見形？載舟亦覆舟，古今同一轍，「順民」卽逆民，參觀非一日。蒼蒼不可問，國亡我何存？誓死不二心，一死報君恩。

（解題）崇禎甲申歲三月十九日，內城破，居民爭書「順民」字條，貼門首以迎賊。作者時官御史，作此詩，自縊而死。

臨終別親友 二首

陳函輝

廉泉同義魄，萬古在禪林，故國千行淚，孤臣一寸心。深山空有恨，異日或相尋。身後遙爲託，應懷鍾子琴。

生死真無補，重扶賴有君。先生留正義，後起訂遺文。落日空日哭，驅車去路分，此心如見許，孤劍在孤墳。

（注釋）鍾子琴 鍾子期，春秋楚人。伯牙鼓琴，志在高山流水，子期聽而知之，子期死，伯牙鼓琴絕弦，謂世無知音者。 孤劍句 季札初使，過徐，徐君好季札劍，口弗

敢言，季札心知之，爲使上國未獻。比返，徐君已死，乃解劍繫徐君冢樹而去。

絕命詞 十首錄五

前人

生爲大明之人，死作大明之鬼。笑指白雲深處，蕭然一無所累。父母恩無可報，妻兒面不能親。落日樵夫湖上，應憐故國孤臣。慧業降生文人，此去不留一字，惟將子孝臣忠，貽與人間同志。臣年五十有七，回首萬事已畢，徒慙赤手擎天，惟見白虹貫日。

手著遺文千册，尙存副在名山，正學焚書并出，所南心史難刪。

〔注釋〕慧業 佛家語，謂智慧之業用也。白虹貫日 荆軻慕燕丹之義，白虹貫日。注：

「精誠所感，白虹爲之貫日。」正學句 正學謂方孝孺，字希直，明甯海人。建文時，爲侍講學士，燕王入南京，令草詔，不從，被殺。孝孺自名其室曰正學，世稱正學先生，死後，焚其書。心史句 鄭所南有心史，見前注。

塞上曲

胡應麟

紫電花驄白玉鞭，遠從都護出居延，清秋不辨龍城色，一片黃雲瀚海間。

〔注釋〕紫電 寶劍名。居延 關名。龍城 卽黃龍府。瀚海 卽蒙古沙漠也。

出塞曲

前人

大獵漁陽罷，椎牛上谷營，酒闌飛騎去，夜奪受降城。

〔注釋〕漁陽 故城在今河北密雲縣西南。椎牛 殺牛也。上谷 上谷郡故治在河北易

縣。酒闌 飲酒半罷也。受降城 漢武帝時將軍公孫敖築，在今綏遠烏拉特旗

北。

出塞曲

王用賓

賀蘭山下羽書飛，廣武營中戰馬肥；壯士爭誇神臂弩，打圍先射白狼歸。

（注釋）賀蘭山，在寧夏廣武營，昔楚漢相持於河南河陰縣，各築一城，中曰廣武澗。打圍，圍獵也。

絕命詩

張國維

艱難百戰戴吾君，拒敵辭唐氣勵雲。時去仍爲朱氏鬼，精靈常傍孝陵墳。

（注釋）拒敵，屢抗清兵也。辭唐，作者奉桂王，唐王招之不去。孝陵，明太祖陵墓，在南京紫金山下。

避地日本感賦二首

朱之瑜

漢土西看白日昏，傷心胡虜據中原。衣冠誰有先朝制？

東海翻然認故園。

廿年家國今何在？又覩東胡設僞官。
起看漢家天子氣，橫刀大海夜漫漫！

（注釋）衣冠句 日本衣冠仿漢人樣式，故有明朝衣冠之制。東胡 指滿洲。

臨難題案

祁彪佳

圖功爲其難，潔身爲其易。
吾爲其易者，聊存潔身志。
含笑入九泉，浩氣留天地！

過大營舖讀岳少保金沙寺題壁

林棟隆

宋徽二帝蒙塵北，封豕妖氛照山谷。
岳侯建旄桂嶺東，迅掃嵐烟晴暗服。
大營之地昔屯兵，紫電高霞耀日迎。
長驅欲搗黃龍府，曹城小醜安足平。
恢復吞胡心可剖，號令風霆如拉朽。
金牌十二誰召還，血污遊魂莫須有。
我來山寺識忠肝，石畫殘碑掩淚看。
勁氣不隨湖水去，至今江月照人寒。

（解題）大營鋪，卽大營鎮，在湖南祁陽縣，宋岳飛嘗駐兵於此，有永州祁陽縣大營驛題記。

（注釋）宋徽宗 指宋徽宗二帝， 封豕 卽大豕，喻貪暴者。 桂嶺 在湖南臨武縣北。

莫須有 宋秦檜誣岳飛以罪而殺之，韓世忠語檜詰其實，檜曰：「飛子雲與張憲書，雖不明，其事體莫須有。」世忠曰：「莫須有三字，何以服天下？」

聞諸路起兵信

王藥師

日月無光風雨淒，橋山弓劍共哀啼。早知鐵戟埋三輔，
忍見銅駝過五溪。朱亥臂橫皆欲裂，田光頭落手猶提。甬東
亦有蒼頭卒，願効前驅渡浙西。

（注釋）三輔 漢以京兆尹、左馮翊、右扶風，共治長安城中，謂之三輔。 五溪 指貴州境

五溪蠻，漢馬援征蠻卽指此。 朱亥 魏朱亥受信陵君命，袖四十斤鐵椎擊殺晉鄙。

田光 燕田光薦荊軻於太子丹，自刎以明太子勿疑。 蒼頭 卒之青帕者。

絕命詞 三首

莊元宸

誓不負所學，立身非立名。捐軀良烈烈，有待豈偷生！日月茲時暗，乾坤何日明？洗心惟有水，以俟河之清。

故人唐魯公，顛沛勿遽死。事至不可爲，終須一決耳！苦心透層霄，幽恨及沒齒。而我同蹉跎，下泉慚君子。

欲透生死關，須從悟道還。百年身有盡，一死事無難。上與夷齊友，近惟汪馬班，致身在何地，明月照溪灣。

（注釋）唐魯公 謂顏真卿，此處指明末之殉國者。汪馬 謂汪君常、馬長源。

揚州哭史督輔老師墓

韓繹祖

權臣內擅外強藩，來往江淮一旅屯。馬革空留酬義骨，龍髯追從鑒忠魂。運移諸葛終無效，力盡睢陽又絕援。夢裏旌旗催北渡，孤墳何不葬中原！

（解題）揚州梅花嶺有史可法衣冠塚。

（注釋）馬革 猶馬革裹屍。龍髯 謂黃帝升天事。運移句 以諸葛亮輔蜀漢爲喻。唐

人弔諸葛詩：「運移漢祚終難復，志決身殲軍務勞。」力盡 指張巡守睢陽事。

乙將軍歌題劉公舣所作傳後

艾丹生

乙將軍，真天人。烈如南霽雲，又如雷萬春。冒重圍，入孤城，部領二百騎，出入風雨旋雷霆，誰能從之曰張衡。將軍起列校，主將陷陣單騎拔之推主帥，上馬短兵接戰身步行。乙將軍，真天人。初隸黃得功，後隸史道鄰。面中飛矢屹不動，揚州化作睢陽城。將軍戰死舊城下，誰能傳之昌黎文。

（解題）乙將軍 謂乙邦才，明青州人。崇禎中以隊長討賊有功。史可法鎮揚州，以邦才爲副將，城破，自刎死。劉公舣，體仁字，其所著七頌堂文集，有乙將軍傳。

（注釋）南霽雲 爲張巡乞師於竇蘭進明，未應，斷指不食而去；及睢陽陷，遂與巡俱不屈死。雷萬春 張巡部偏將，守雍丘，曾面著六矢不動，其強毅如此，後死難。

主將句 疑有訛奪字。黃得功 爲明福王時江北四鎮之一，史道鄰 卽史可法。昌黎 謂唐韓愈，此喻劉體仁。

絕筆

陳潛夫

父兮生我，申以嚴誨：惟孝惟友，曰忠與義，丙子鄉薦，顧名自勵；名曰孝廉，庶幾無愧，致身之期，歲在癸未；司理開封，星言視事。以身許君，有死無

二。是時兩河，賊氛如蠅，衆人迴車，子獨攬轡。賊出河朔，羣工奔避，子乃渡河，擊楫而濟。誓清河南，以報先帝。手披荆榛，身禦魑魅。獨張空拳，以當賊騎，知有封疆，九死何畏！三十州邑，終復舊地。維時先帝，鑒子忠瘁，授以巡方，繡衣北莅。惜也諸姦，互相牽制，中樞信讒，嫉予不媚。聯絡要圖，置之罔遂，三月撤歸，可爲隕涕。哀哀先人，一時捐棄，甘旨莫遂，遺書淪廢。我哀方盈，姦怒轉熾，赫赫金吾，逮予邸第。圓墻幽憂，寇氛猝至，匍匐歸來，挈家奔避。航海飄零，請兵於會。召募丁男，三百而已，衣甲糗糧，皆予自備。血戰江干，二十餘次，糧寡兵微，於事何裨？疾痛呼號，徒然憤恚。丙戌五月，公侯師潰，區區孤軍，其何能濟！事不可爲，偷生何貴？拜別吾母，以及諸弟，挈吾妻妾，從彭咸逝，成仁取義，千古如是！

（注釋）丙子 崇禎九年。癸未 崇禎十六年。卷 音圈，連弩也。莅 同蒞。金吾

禁衛也。會 會稽也。糗糧 乾糧食米。丙戌 清順治三年。彭咸 殷

賢臣，諫其君不納，投水死。

絕命詩

陸培

誰謂朝廷一命輕，行人使節本皇明。春秋官叙諸侯上，周禮班從司馬名。雍國尙慙收采石，荆胥無計泣秦兵。蕩陰徒有湔衣血，烈帝孤臣恨未平。

（注釋）行人 周禮官名，掌朝覲聘問。雍國 指虞允文。允文受命犒師采石，遂督兵與

金人戰，大敗之。後封雍國公。荆胥 指申包胥泣秦庭乞師事。蕩陰 蕩

陰之戰，晉惠帝敗績，縉縉死節。

書懷

張煌言

一劍橫磨近十霜，端居搔首看天狼。勳名幾誤飛槎客，意氣全輕執戟郎。地上傳書失絳灌，隆中定策起高光。山河縱破人猶在，試把興亡細較量。

（注釋）橫磨 劍名。十霜 星霜十易。天狼 星名。飛槎客 博望乘槎，指漢張

騫故事。 圯上傳書 張子房故事，圯上老人授以太公兵書。 終漢 周勃，漢嬰

，均漢文帝大將。 隆中定策 劉備見諸葛亮於隆中，定天下三分之策。 高光

漢高祖，漢光武帝。

北還入浙偶成

前人

南浮北泛幾經春，死別生還總此身。湖海尙留奔鬲客，山
川應識報韓人！國從去後占興廢，家近歸時問假真？一寸丹
心三尺劍，更無餘物答君親。

（注釋）奔鬲客 夏時有窮之君發不修民事，爲其嬖臣寒浞所殺，羿臣靡奔有鬲氏。 報韓

人 張良家世爲韓相，爲韓報仇。

庚子元旦駐師林門

前人

中華正朔古相傳，永歷於今十四年。玉几南荒新日月，金
戈北道舊山川。春來水逐桃花浪，老去人憎柏葉先。猶幸此
身仍健在，擬隨寸柄獨迴天。

（注釋）永騷 明季永明王由榔之國號，至十六年亡。玉几 書：「皇后憑玉几道揚末命」，言成王將崩而有訓詞也。

隨斗柄 斗謂北斗星，言隨斗柄所指，喻奉君也。

驚聞行在之變正值虜廷逮余親屬痛念家國何能已已 前人

自分孤臣九死應，國仇家難轉相仍。埋名恨不同梅尉，誓旅知非擬駱丞。芳草王孫歸莫望，蒼梧帝子去無憑。挽戈此日將何待？仰視浮雲一拊膺。

（注釋）仍 重也，頻也。梅尉 漢鄧尉隱於江蘇吳縣西南之萬峯山，後山因人得名，不

曰萬峯而曰鄧尉。山多梅樹，花時一望如雪，故云梅尉。駱丞 唐駱賓王官臨海

丞，世稱駱丞。芳草王孫 王孫，貴家子弟。唐王維詩：「芳艸明年綠，王孫歸

不歸？」蒼梧弟子 蒼梧山一名九疑山，舜崩於蒼梧之野，在今湖南甯遠。

膺 胸也。

憶西湖

前人

夢裏相逢西子湖，誰知夢裏却模糊！高墳武穆連忠肅，添得新祠一座無？

（注釋）武穆 岳飛諡武穆。 忠肅 于謙諡忠肅。

甲辰八月辭故里 二首

前人

義幟縱橫十二年，豈知閏位在於闐！桐江空繫嚴光釣，震澤難回范蠡船。生比鴻毛猶負國，死留碧血欲支天。忠貞自是孤臣事，敢望千秋信史傳？

國亡家破欲何之？西子湖頭有我師。日月雙懸于氏墓，乾坤半壁岳家祠。慚將素手分三席，敢謂丹心借一支？他日素車東浙路，怒濤豈必屬鴟夷？

（注釋）閏位 言非正統，雖即帝位，猶如閏月也。 于闐 漢西域國名，今新疆和闐城。

桐江 浙江在桐廬縣境合桐溪曰桐江。 震澤 卽今太湖，一作五湖。 西子湖

句 指岳飛于謙。 鴟夷 吳王以鴟夷革盛伍子胥尸，浮之江中。

被執過故里

前人

蘇卿仗漢節，十九歲華遷；管寧客遼東，亦閱十九年。還朝千古事，歸國一

身全。余獨生不辰，家國兩荒烟，飄零近廿載，仰止愧前賢。豈意避秦人，翻作楚囚憐！蒙頭來故里，城郭尚依然，彷彿丁令威，魂歸華表巔。有覩此面目，難爲父老言。知者哀我辱，愚者笑我頑，或謂真達士，謂此勝錦旋。人生七尺軀，百歲寧復延？所貴一寸丹，可喻金石堅，求仁而得仁，抑又何怨焉？

（注釋）管甯 三國朱虛人，字幼安，漢末，避黃巾之亂，居遼東，十九年始歸。避秦人

桃花源記：「自云先世避秦時亂。」丁令威 漢遼東人，學道於靈虛山，後化

鶴歸遼。錦旋 謂衣錦還鄉。一寸丹 謂赤心也。求仁句 論語：「求仁而

得仁，又何怨？」

師入甯國時徽郡來降留都尚未克服

前人

千騎東方出上游，天聲今喜到宣州。威儀今日驚司隸，
勳業何人愧徹侯？舊闕烽煙須早靖，新都版籍已全收。遺民
莫道來蘇好，猶恐瘡痍未可瘳。

（注釋）司隸 官名，掌帥領罪隸俘虜以給勞役。徹侯 秦廢古五等爵，惟留侯爵，

以賞功勞。在第二十級，爲爵之最尊者，稱曰徹侯。徹，通也，言其爵位上通於天子也。 版籍 卽戶口冊

即事

前人

十載冰霜誓枕戈，豈應歧路轉風波？
和戎魏絳終當謬，結客燕丹恐亦訛。
剖竹已非秦郡縣，分茅可是漢山河？
孤臣獨有干將在，紫氣青旻自不磨。

（注釋）魏絳 春秋晉大夫，晉悼公時言和戎五利，晉侯乃使盟諸戎。晉無戎患，得專力諸

夏，因以復霸。燕丹 戰國時燕王喜之太子丹。剖竹猶言剖符，謂封土也。

分茅 謂分頒茅土也。干將 寶劍名，紫氣 寶劍之氣。旻 文也，爾雅「

秋爲旻天」。

十年戎馬

前人

相業侯封非我望，伯圖王命向誰論？
可憐節旄旄全落，獨恨交亡劍尙存。
上客攝衣空有鋏，孤軍裹甲已無禪。
也知

戈朽難回日，誓死何妨絕影奔！

（解釋）十年戎馬原題爲：「張書紳與范子瞻論余十年戎馬，勞苦孤危，有詩見贈，讀之慨然，因成二首」。此其一也。

（注釋）伯圖，霸者之成功也，伯同霸。節在旄落，匈奴令蘇武牧羊，武杖漢節，臥起操持，節旄盡落，空有鉞。孟嘗君客馮驩，彈鋏而歌曰：「長鋏歸來乎？食無魚！」
「鉞，劍也。」

復趙督台二首

前人

不堪百折弔孤臣，四顧蒼茫九死身。誰挽龍髯空問鼎？姑留螳臂強當輪。謀同曹社非無鬼，哭罷秦庭那有人？敢是天方從閔位，黃雲白草未生春？

擲揄一旅尙圖存，吞炭吞氈可共論。敢望臣靡興夏祀？祇憑帝眷答商孫！衣冠猶帶雲霞色，旌旆長懸日月辰。贏得孤軍同碩果，也留正氣在乾坤！

（注釋）龍髯句 史記封禪書：「黃帝采首山銅鑄鼎於荆山下；鼎既成，有龍垂胡髯下迎黃

帝。黃帝上騎，羣臣後宮成上者七十餘人。龍乃上去，餘小臣不得上，乃悉持龍

弄，龍髯拔墮，墮黃帝之弓，百姓仰望，黃帝既上天，乃抱其弓與胡髯號。」

（注釋）螳臂當輪 卽螳臂當車，喻氣雄而力薄，於事無濟也。曹社 曹，國名；社，社

稷；春秋時，曹國有人夢衆君子立於社宮而謀亡曹，後卒爲宋所滅。一旅 左傳

：「有衆一旅」，注：「五百人爲旅。」吞炭 趙襄子滅智伯，豫讓漆身爲癩，

吞炭爲啞，謀刺襄子，爲智伯報讎。吞氈 謂蘇武牧羊海上，嚼雪吞氈事。臣

靡句 夏有窮之君羿，爲其臣寒浞所殺，羿臣靡奔有函氏，後靡滅寒浞而足少康。

碩果 物之僅存者。

挽張鯤淵相國二首錄一

前 人

一身真可繫安危，垂死威儀尙漢官，魂返黃墟應化碧，
顏留青史卽還丹。千秋共惜遺金鑑，十載何慚帶鐵冠！也識
公歸箕尾上，定依日月倍芒寒。

（解題）鯤淵謂張青堂。

（注釋）垂死句 肯堂臨難時，蟒袍就縊。黃墟 地下也。金鑑 唐張九齡於千秋節上

事鑑十章，號千秋金鑑錄，以伸諷諭。鐵冠 御史之冠，肯堂曾官御史，故云。

箕尾 二星名。芒 謂星之光芒。

弔沈五梅中丞

前人

香台咫尺渺人琴，萬里寒潮送夕陰。報國千年藏碧血，
毀家十載散黃金。名山難瘞孤臣骨，潮海空磨戰士鐔。留得
荒祠姓氏古，春歸惟有杜鵑吟。

（解題）沈五梅，不詳

（注釋）鐔 兵器，似劍而小。

追往八首錄一

前人

長驅胡騎幾曾經，草木江南半帶腥。肝腦總應塗舊闕，
鬚眉誰復嘆新亭！椎飛博浪沙先起，弩注錢塘潮亦停。回首

河山空血戰，只留風雨響青萍。

(注釋) 經注句 謂吳越錢鏐王射潮故事。青萍 名劍也。

絕命詩

前人

我年四十五，偏逢九月七，大廈已不支，成仁萬事畢！

張司馬墓

黃宗羲

草荒樹密路三叉，下馬來尋日色斜，頑石嗚呼都作字，
冬青憔悴未開花。

(解題) 張司馬 即張國維，詳見作者小傳。

蒼水

前人

念年苦節何人似？得此全歸亦稱情。廢寺釀錢收棄骨，
老生秃筆記琴聲。遙空摩影狂相得，羣水穿礁浩未平。兩世
雪交私不得，只隨衆口一閒評。

（解題）蒼水 詠張燁言事。

（注釋）全歸 禮記：「父母全而生之，子全而歸之一。」

釣 臺

前 人

曾注西台痛哭記，摩挲老眼見崔嵬。當時朱烏魂問返，今日誰人雪後來？江上愁心絲百尺，平生奇險浪千堆。欲修故事如皋羽，同志方吳安在哉？

（注釋）西台痛哭記 謝皋羽作。方吳 謂方鳳、吳渭，均宋末遺民，結月泉吟社。

卓烈婦四首

前 人

兵戈南下日爲昏，匪石寒松聚一門。痛殺懷中三歲子，也隨阿母作忠魂。無數衣冠拜馬前，獨傳閨閣動人憐！汨羅江上千年淚，灑作清池一勺泉。問我諸姑淚亂流，風塵不染免貽羞。一行玉佩歸天上。轉眼降旛出石頭。五子才華似長卿，斷腸數語寫如生。至今杜宇聲聲血。還向池頭叫月明。

（解題）原序云：「烈婦爲廣陵諸生錢公穎女，年十七，歸前指揮卓煥。煥字文伯，以軍功

累官指揮使，逮廣甯陷，徙居揚州，隨督輔史公法守城。乙酉夏四月，揚州城將陷前一日，烈婦曰：城陷必屠，婦女不能免辱，孰若先死？煥止之，謀匿復壁，婦不可，抱三歲兒，奔後園躍入池死。時煥之姑適王氏者，少寡，歸甯於家，亦躍入。煥未字之妹二，幼弟三，亦皆躍入。嗚呼！烈婦一言，未亡之人，未嫁之女，孩提之童，一時感憤激烈，相率從死，真可慨也！吾友蕭山王自牧作傳甚詳其事，余爲賦詩四章。」

（注釋）匪石 詩：「我心匪石，不可轉也」。言心志之堅定也。 寒松 歲寒然後知松柏之後凋，喻志節之堅貞也。 汨羅江 在湖南湘陰境，戰國時楚屈原自沉於此。

石頭句 謂南都出降，石頭城，南京也。唐杜牧詩：「一片降旛出石頭。」 王子謂蕭山王自牧，曾爲烈婦作傳者。 長卿 司馬相如字，西漢詞賦家。

卓烈婦

黃 達

乙酉圍揚州，城門一月閉。丁壯死城頭，老弱哭街市。烈婦語其夫：「請君從此逝。不見高傑兵，殺掠無巨網？况茲雄師來，後先皆鐵騎！憶昔結髮時，雙雙坐羅綺，池上兩鴛鴦，見之嬌不起。如今張網羅，反覆迷天地。雄飛雌必隨，

雌在雄反累，所有週歲兒，地下爲君乳。城角一聲裂，城內兵四至，遣夫出前門，驅家後園避。白髮夫長姑，黃口夫諸弟，小姑兩齊肩，掌珠抱者是。共妾爲八人，所去唯夫婿。妾身不可污，兵刃一何利。長幼聚一堂，緩急權大義。夫婿園中池，夫婿池中水，水中自有天，藏我蛾眉麗。一躍婦與兒，再躍長姑繼，三躍雙小姑，四躍靡遺類。生願相從生，死願相從死。清波激其上，明月枕其底。不聞門外兵，殺人如屠豕！

（解題）卓烈婦本事見上黃宗羲詠卓烈婦原序，此首可與黃詩參看。

（注釋）乙酉係清順治二年，高傑明末米脂人。初從李自成，後降明爲總兵管。幅王時，鎮揚州，州民不納，史可法移其衆於瓜州，爲四鎮之一。

贈柳生名敬亭

毛奇齡

流落人間柳敬亭，消除豪氣鬢星星，江南多少前朝事，說與人間不忍聽！

（解題）柳敬亭，善說書詞，任俠重交，明季遊於將相之門，曾爲左良玉幕客。作者爲明

之遺老，贈柳一詩，亦若天寶亂後杜甫之贈詩李龜年也。

出關

徐蘭

憑山俯海古邊州，旆影風翻見戍樓。
馬後雪花馬前雪，出關爭得不回頭？

（解題）山海關詩，以此爲古今絕唱。

釣臺

洪昇

逃却高名遠俗塵，披裘澤畔獨垂綸。
千秋一個劉文叔，記得徵時有故人。

（解題）釣臺在桐廬富春山下。

（注釋）劉文叔 卽漢光武帝。

詠史

陸次雲

儒冠儒服委邱墟，文采風流化土苴。
尙有陸生坑不盡，

留他馬上說詩書。

（解題） 漢陸賈使南越反，時向高祖說稱詩書，高祖罵之曰：「乃公居馬上得之，安事詩書？」陸生曰：「居馬上得之，甯可以馬上治之乎？」此詩詠秦始皇坑儒生，未必坑盡，意指清代屢興文字獄，將亦無濟於事。篇中陸生，語意雙關。

秋夜宿葛嶺涵青精舍

厲鶚

書燈佛火影清涼，
夜上層樓看海光。
蕉飈暗廊蟲弔月，
無人知是半閒堂。

（注釋） 飈音占，上聲；凡風之動物與動物受風搖曳者，皆謂之飈。半閒堂 在西湖葛嶺，宋相賈似道所建，其門蟋蟀卽在此。

男從軍

胡天游

自古男兒要自強，
腰間金印有時黃；
時來不用龍泉劍，
手縛樓闌獻廟堂。

（注釋） 龍泉 浙東龍泉縣以產劍著；一說龍泉，劍名。樓闌 漢西域國名，此處泛指

爲忠中國之敵人。

謁岳王墓七首

袁枚

靈旗風捲陣雲涼，萬里長城一夜霜。天意小朝廷已定，那容公作郭汾陽？
遠寄金環望九哥，一朝兵到又回戈，定知五國城中淚，更比朱仙鎮上多！
一個西湖換兩宮，靖康小雅唱雍容。憐他絕代英雄將，爭不遲生付孝宗？
歲歲君臣拜詔書，南朝可謂有人無？看燒石勒求和幣，司馬家兒是丈夫。
小校桓桓道姓施，湧金門外有專祠。雄心似出將軍上，不斬金人斬太師。
華表凌霄落照遲，一朝孤憤萬年知。梨花寒食燒香女，織手都來折檜枝。
江山也要偉人扶，神化丹青即畫圖。賴有岳于雙少保，人門纔覺重西湖。

（注釋）小朝廷 指南宋偏都臨安。 郭汾陽 唐汾陽王郭子儀，平安史之亂，恢復兩京，

復敗回紇，唐祚賴以中興。 九哥 宋高宗小名。 五國城 在吉林，甯古塔相近

，宋徽欽二帝死於此。 朱仙鎮 在河南開封縣西南，岳飛大破金兵於此。 兩宮

指徽欽二宗。 靖康 宋欽宗年號。 孝宗 高宗子，銳意北伐，有恢復中原之

志。拜詔書 宋孝宗致金國書，自稱大宋姪皇帝。石勒 晉時羯胡石勒，僭佔中原，致書於晉元帝，當爲焚之，以示拒絕。司馬家兒 指晉帝 姓司馬。小校……姓施句 岳飛被害，有將官施全，曾謀刺秦檜未成。湧金門……專詞句 西湖有施全廟，湧金門杭城門名。織手……折檜枝句 岳武穆墓前，有松檜數株，枝皆向南不向北。岳子雙少保句 指岳飛 子謙，并爵太子少保，兩墓同在西湖。

湖上雜詩二首

前人

六陵何處認冬青？望帝魂歸淚欲零。
偏有子規不解事，聲聲啼與岳王聽。

鳳嶺高登演武台，排衙石山大風來。
錢王英武康王弱，一樣江山兩樣才。

（注釋）六陵句 元僧盜發宋陵，唐丑、林景熙爲之收葬後，植以冬青樹。望帝 古蜀國

帝王，死後化子規，一名杜鵑。鳳嶺 卽杭州鳳凰山，宋建行宮，山環入禁苑，

其頂砥平，可容萬馬，有宋御毅塲。排御石，巖巖西嶺，石筍林立，尖越王錢鏐名之曰排衙石。康王 卽南宋高宗。

費宮人刺虎歌

前人

九殿瑟瑟鳴戰鼓，萬朵花迎一隻虎。女兒中有有心人，詭說「儂家是公主」。公主姿容世寡雙，色能伏虎虎心降，笑捋虎鬚向虎語：「洞房請解軍中裝」。一杯勸一杯，沈沈虎竟醉。「刃此小於菟，下報先皇帝」。紅燭千條徹帳光，白虹一道衝天氣。

（解題）李白成破都城入宮，費宮人脫公主，出以自代。自成初欲納之，後以賜愛將羅一虎。虎喜甚。宮人夜灌虎醉，刺虎死，亦自刎。事見陸次雲費宮人傳。

（注釋）於菟 讀如烏徒，楚人呼兔曰於菟。

曾襄愍銑

嚴遂成

八圖營陣最分明，規復三年事可成。裴度不曾邀帝斷，李晟空自負天生。一腔東市朝衣血。三面黃河戰鼓聲。游牧

從茲淪異域，傷心莫問受降城。

（解釋）明史 曾銑傳：「銑字子重，江都人。嘉靖二十五年，總督陝西三邊軍務，銑念寇居河套，久爲中國患，遂條上方略十八事，已，又獻營陣八圖。輔臣夏言主之甚力。時嚴嵩與言有隙，欲因以傾言，乃極言套必不可復。帝乃遣官逮銑，然無意殺之也。嵩誣銑賂賂當途，帝入其說，遂當銑交結近侍律斬，即日行刑。隆慶初，詔諡襄愍。」按襄愍復套之議甚偉，卒以權臣當軸，致中危法受戮；厥後熊廷弼之論死，正復先後一轍，長城自壞，良用慨然！

（注釋）規復句 曾銑傳：「銑欲築邊牆禦寇，請帑金數十萬，期三年畢功。 裴度句 裴度唐山西聞喜人，憲宗時，以中書侍郎討平淮蔡，韓愈平淮西碑有云：「凡此蔡功，惟斷乃成」。 李晟句 晟字良器，洮州臨潭人。德宗時，平朱泚，收復京師，德宗嘗曰：「天生李晟，以爲社稷，非爲朕也」。 一腔句 漢書晁錯傳：「錯衣朝衣，斬東市」。 三面句 河套，東西北三面距黃河。時俺答據河套，屢寇明邊。 受降城 漢唐均有受降城。漢武帝築城九原北塞外，唐在黃河東西北三岸，分

築三城。

蔡忠襄公祠

前人

飛渡黃河勢已成，但憑一掌守孤城。三千兵帶饑寒色，
百二關傳慟哭聲。報國不能生殺賊，殉君何用死留名！遺祠
蕭颯橫汾曲，夜夜泉飛白鶴鳴。

（解題）明史 蔡懋德傳：「懋德，崑山人。崇禎十四年，巡撫山西。李自成陷河南，懋德禦之河上。十六年冬，自成破潼關，自西安盡有三秦。懋德扼守河津，依黃河爲險，以疲卒三千，當百萬狂寇，走還太原。及賊登城，卽自剄，麾下持之；至三立祠，就縊乃絕」。

（注釋）百二關句 賈賓王詩：「秦地重關一百二，」汾曲 山西汾水。泉飛句 原注云：「公葬時，山泉忽飛，白鶴繞墓」。

雙忠祠

吳錫麒

江南已無乾淨土，師相方開都督府。闔外祇知蟻蜂經，禁中早轉蝦蟆鼓。一朝制置敕書頒，拚柱淮南敢憚艱。戎馬新聞辟君實，訛言偏誤走文山。鑄成此錯皆天耳，忠義要爲當代倚。得賢曾號小朝廷，敢死終成好男子。老鶴鬻前烽滿天，又見都統冒戈鏃。摩雲陣自盤三疊，裹血身猶奮一肩。眼前日見邊疆壞，豈特盧龍有人賣。祇緣社稷勉圖存，如此國家堪幾敗！北兵聞說指臨安，風鶴傳來心膽寒。寡婦孤兒愁執訴，殘山賸水夢都難。臣身豈冀須臾活，臣力惟思兩宮奪。瓜州月黑戰方塵，蒲市風寒營早拔。詔書屢勸寧不聞，死耳豈作降將軍。國殤一首流騷怨，沙蹟雙旗閃怒雲。茫茫天水空遺業，黯黯冬青埋一錘。氣連難回白雁謠，君臣同入紅羊劫。下馬今來醉此尊，可曾閣部與招魂？前身本是同時客，袍笏虛堂夜共論。

（解題）原注，宋末李庭芝妻才死節，祠在梅花嶺。此詩有議論，有筆力，整練處復饒有詞彩色澤，極經營慘淡之致。

（注釋）江南句 宋史汪立信傳：「今江南無一寸乾淨土，某去尋一片趙家地上死，要死得

分明爾！」帥相句 宋史賈似道傳：「似道，字帥憲，台州人。理宗拜右丞相，度宗拜太師。元兵破鄂，太學諸生羣言非帥臣親出不可！似道不得已，始開都督府臨安。闕外闕，國門也。蟋蟀經 賈似道傳：「似道羣妾踞地鬥蟋蟀，所狎客入，戲之曰，此軍國軍事耶？」蝦蟆鼓 周遜道豹隱紀談：「內樓五更絕，搊鼓交作，謂之蝦蟆更」。此言國家之將絕也。制置句 宋史李庭芝傳：「庭芝，字祥甫。賈似道鎮京湖，起爲制置司參議，移鎮兩淮；與似道議柵清河五河口，增淮南烽百二十。繼知濠州，復城荊山，以備淮南，皆切中機會。尋丁母憂，奪情主管兩淮制置司事」。君主時代，凡論誥外藩及京外官者曰敕書。 搯柱 支撐也；搯，音支。 君實句 宋史忠義傳：「陸秀夫，字君實，楚州鹽城人。李庭芝鎮淮南，聞其名，辟至幕中。時天下稱得士多者，以淮南爲第一，號小朝廷」。辟同避。

文山句 文天祥，號文山，恭宗德祐二年，爲元所執，嗣脫歸，至眞州。苗再成說以約兩淮兵，同日舉義，天祥稱善，即以書遺李庭芝，遣使四出結約。初天祥未至眞時，揚有脫歸兵，言元密遣一丞相，入眞州說降，庭芝信之，下令捕天祥，甚急，天祥乃變姓名，由通州汎海如溫州，以求二王。 好男子句（原注）阿珠使

趙淮至揚州，招庭芝，淮至揚州城下，大呼曰：「庭芝，男子死耳，何降也！」老鸛齧句 老鸛齧在江蘇儀真縣（即真州）東南，齧與嘴同。 邵統句 宋史忠義傳：「姜才，濠州人，隸淮南兵中，以善戰名，爲通州副都統。 鏃 鐵把短矛也，晉延。 摩雲句 李庭芝率勵所部，固守揚州，及阿珠攻真州，苗再成與趙孟錦，帥兵大戰於老鸛齧，收績，阿珠乘勝攻揚州，姜才爲三疊陣，逆之三里溝，戰有功。 又與元帥戰楊子橋，日暮兵亂，流矢貫才肩，才拔矢，揮刀而前，所向辟易。

盧龍句 三國魏志：「漢末右北平人田疇，常忿烏丸賊殺其郡冠蓋，有欲討之意，而力未能。建安十二年，曹操征烏丸，疇詣軍獻策，請出盧龍口，越白檀之險，掩其不備，操從之。既克烏丸，操欲侯疇，疇固辭，謂蒙恩全活，爲幸多矣，豈可賣盧龍之塞，以易賞祿？」 國家句（原注）王煥因張世傑敗於焦山，復言曰：「今世傑以諸將心力不一而敗，不知國家尙堪幾收耶！」 寡婦句 寡婦謂皇太后全氏；孤兒，謂恭帝熹。元伯顏入臨安，以恭帝及皇太后北去。 臣身句 元伯顏以宋帝北行，至瓜州，庭芝與才涕泣誓將士出奪之，衆皆感泣。乃盡散金帛犒軍，以四萬人夜擣瓜州，戰三時，衆擁帝避去。才追戰至浦子市，夜猶不退。阿珠使人招之

，才曰：「吾甯死，豈作降將軍邪！」真州苗再成，亦諱奪奪不取。鑿於刃切。

蒲市 疑卽浦子市。詔書句 阿珠以宋太皇太后手詔諭庭芝使降，庭芝登城，

謂使者曰：「奉詔守城，未聞以詔諭降也。」既而阿珠復遣使者，持元主詔招庭芝

，庭芝開壁納使者斬之，焚其詔於陣上。國殤兩句 屈原九歌，國殤注，謂死於

國事者。磧 音迹，淺水中沙石也。天水句 宋史五行志：「江南李昶末年，

宮中盛雨水染淺碧爲衣，號天水碧；天水，宋之姓望也。黯黯句 元世祖時，西

僧楊璉真珈盡發宋西興諸陵，毀棄骸骨，宋遺民唐珏、林景熙，潛拾遺骸，盛以二

函，葬於越山，植冬青樹誌之，翻鑿有冬青引，見本集選錄。鏞，音插。白雁

謠句 宋末童謠云：「白雁望南飛，馬札望北歸」。未幾，元將伯顏統帥南下，白

雁者，伯顏也。紅羊劫句 宋理宗淳祐中，柴望，上丙丁龜鑑十卷，謂丙午丁未

之年，中國皆有亂事。後人以丙陽火，色赤，未爲羊，遂謂國難之時，爲紅羊劫歲

。醜，音類。閹部句 閹部，指史可法，其墓亦在揚州梅花嶺。前身 句史

閹部母夢文丞相入夢，生可法，相傳以爲文山後身。

鳳凰山懷古

前人

松光透天天欲溼，作勢蟠拏萬蛟立。咫尺蒼茫不辨人，厓山暗掩寒濤入。杭人故事說康王，行宮十里營錢塘。西湖花鳥奉宸賞，不與汴水同荒涼。納涼聞幸翠寒堂，講武還過御教塲。此時入山入大內，鳳凰爾在雲中翔。千官劍珮花漏午，不如今者惟斜陽。嗚呼宴安鳩毒厚，金牌竟阻黃龍酒。風波獄起墮長城。從此中原非宋有，嗚呼游戲干戈生，襄陽炮火燒空明。笙歌夢轉秋風急，蟋蟀聲催白雁聲。主失乾綱臣誤國，撞壞家居良可惜。殘山猶作畫圖看，一片傷心天水碧，鳳兮鳳兮爾亦衰，眼見宮闕成蒿萊。幾樹冬青怪鷓宿，隔江風雨諸陵來。

（解題）鳳凰山，在杭縣城南，卽南宋都城臨安也。本詩一嘆高宗誤於秦檜，一嘆理宗誤於賈似道，庸愚若一，痛罵處，慷慨淋漓。

（注釋）掣 同拿，牽引也。厓山 厓，通崖。厓山在廣東新會縣南，宋末，陸秀夫負帝昀於此蹈海死。康王 名構，卽南宋高宗。行宮 天子出行所居，南宋於鳳凰山建行宮。宸賞 宸音辰，帝居曰宸，宸賞，猶帝賞也。汴水，在河南，今澶。

翠寒堂 孝宗淳熙六年，上作翠寒堂於禁中，以日本松爲之。大內 天子所居

。宴安鳩毒 左傳：「宴安鳩毒，不可懷也」。言宴安之禍，比於鴆毒；鳩，通
鴆。 金牌句 黃龍爲契丹所置府，遼又稱黃龍府路，今遼甯開原以北，及吉林全
境，皆其轄地。岳飛大破金兀朮於朱仙鎮，金將相繼來降，岳飛大喜，語其下曰：
「直抵黃龍府，與諸君痛飲耳！」方指日渡河，而秦檜欲與金和，詔飛班師，飛一
日奉十二金字牌，乃憤惋泣下。 風波句 宋史岳飛傳論：昔劉宋殺檀道濟，道濟
下獄，瞋目曰：「自壞汝萬里長城」。高宗忍自棄其中原，故忍殺飛。襄陽在湖
北。時襄陽被圍，已五年，賈似道不以聞。咸淳九年，元將劉整以回回大砲破樊城
，襄陽守將呂文煥，知不可守，遂以襄陽降元。 遊戲 指似道湖上逍遙與妓妾鬥
蟋蟀事。 撞壞句 晉書陸納傳：「時會稽王道子，以少年專政，委任羣小，納望
闕而嘆曰：「好家居，織兒欲撞壞之耶！」」 殘山句 南宋光宗時，畫院詔馬遠
工畫山水，所作皆小景，無滿幅者，時謂之馬一角，識者嘆爲山河殘破之兆。 風
兮句 論語：「鳳兮鳳兮，何德之衰！」 隔江句 崔曙詩：「二陵風雨自東來」
。宋室諸陵，均在蕭山縣西興，與臨安隔一錢塘江耳。

木 蘭

陳文述

夢隔黃河水一涯，明駝十載送還家；沙場百戰橫戈後，
如此英雄却姓花。

〔解題〕 木蘭，六朝時安徽亳縣人，代父從軍，古樂府有木蘭辭一篇，敘木蘭身世及從軍前後情形。

〔注釋〕 夢隔黃河……句 木蘭辭：「朝辭爺娘去，暮宿黃河邊」。明駝……還家句

木蘭辭：「願借明駝千里足，送兒還故鄉」。明駝即駱駝。

史 墩

前 人

北來萬馬飲淮流，四鎮兵驕一哭休。義士三千同日死，
滿洲碧血在揚州。

〔解題〕 史墩 自注史可法別墅。

〔注釋〕 四鎮兵驕……句 指高傑、許定國等，不受史督師調度，史公坐圍孤城，惟有以

死報國耳。義士三千……句 指史公麾下三千人，隨公殉國事。碧血……揚州

句 清兵破揚州，殺戮最慘重，後世有揚州十日記一書。

秦淮弔方女殉節處

前人

靖難兵來怨氣深，忠臣奇節盛如林。何如正學當年事？

十族捐生二女沈。

（解題） 秦淮 河名，在南京。方孝孺既遭族誅，其二女亦自沈秦淮。

（注釋） 靖難 明成祖起兵南下，號靖難兵。 正學 方孝孺名其書室曰正學。 十族

成祖逼方孝孺草即位詔，方不從，哭且罵，成祖曰：「汝不顧九族耶？」孝孺奮然曰：「便十族，奈何！」成祖曰：「汝焉能遽死？當滅汝十族！」遂被害，并誅及孝孺門人。

題 壁 并序

袁祖志

道光壬寅，游金陵雞籠山，登橫軸閣，見王蔗香茂才題壁四律，慷慨悲歌，一時傳誦。迄今五十餘年，僅能記起四句，偶一憶及，極與目前時事吻合，爰爲

續成一律，以存其人，兼以誌慨。

扶桑東指海雲平，二百年來罕用兵。不信沙蟲成敵國，
那堪猿鶴失先聲？用才絕少千人傑，誤國難逃萬世評。太息
盈廷無一策，尊榮安富愧褒旌。

（解題） 壬寅 清道光二十二年。

（注釋） 沙蟲 謂小人。猿鶴 指君子，以喻中國。

黃天蕩

柴靜儀

玉面雲鬢拂戰塵，芙蓉小隊簇江濱；不操井臼操桴鼓，
誰信英雄是美人？

（解題） 自注，詠梁紅玉。紅玉，宋韓世忠夫人，與金兀朮大戰，親操桴鼓，大敗金兵。

（注釋） 芙蓉 謂美女也。

湯陰謁岳忠武廟

俞樾

十年闔外枕雕戈，奈此秦頭壓日何！南渡君臣生氣少，東窗夫婦殺機多。功高豈意翻成罪。戰勝無端更議和。不待籲天誣早辯，精忠二字總難磨！

（注釋）闔外 闔、國門也；將兵在外曰闔外。籲天 呼告於天也。

吳山伍相祠二首

黃燮清

鹿走荒台霸業空，獨留遺廟颯英風。越山對面青無數，常在孤臣淚眼中。

白馬靈旗蹴浪行，英雄遺恨幾時平？江潮怒挾風雷勢，猶似夫椒戰鼓聲。

（解題）吳山在杭縣，今俗名伍公山。

（注釋）鹿走荒台……句 史記：「子胥諫吳王曰：臣今見麋鹿游姑蘇之台也！」白馬

……蹴浪句 吳王既殺伍子胥，投屍江中，吳人輒見子胥之靈，跨白馬，隨流揚波

，依潮來往，蕩激崩岸云。夫椒 吳夫差二年，曾敗越軍於夫椒，卽今太湖中之包山。

驛次題壁

查蕙纈

薄命花飛水上游，翠娥雙鎖對沙鷗。塞垣草沒三韓路，
野戍風淒六月秋。口讀父書心未死，目懸國難淚空流。傷神
暗譜琵琶怨，羅袖香消土滿頭。

（解題）

蕙纈父柰嗣庭，雍正間典江西試，所出題目世宗謂其諷刺時事，心懷怨望；又柰

其筆札詩鈔，謂爲語多悖逆，下獄病死，戮其屍。

光復軍口號

秋瑾

黃河源溯浙江潮，衛我中華漢族豪。莫使滿胡留片甲，
軒轅神胄是天驕。

（解題）

先烈徐錫麟在安慶起義，瑾在江浙亦密組光復軍。

（注釋）

天驕 言其強盛，若天之寵助也。

杞人憂

前人

幽王烽火幾時收？聞道中洋戰未休；漆室空懷憂國恨，
難將巾幗易兜鍪。

〔解題〕 列子：「杞國人，憂天將墜，身無所寄」。

〔注釋〕 幽王烽火……句 周幽王與褒姒舉烽火爲戲；及犬戎入寇，更舉烽火，諸侯兵不

至，遂爲犬戎所弑。漆室 魯漆室女曰：「魯國有患，君臣父子被其辱。婦女安

所避乎？」巾幗 婦女首飾。諸葛亮伐魏，數挑戰，司馬懿不出，亮遺懿巾幗婦

人之飾以辱之。今通稱婦女曰巾幗。兜鍪 音逗謀，戰時所著之冠，以禦兵刃，

古謂之冑，秦謂之兜鍪，俗謂之盔；古用革，後或以鐵爲之；一作兜牟。

寄友

前人

何人慷慨賦同仇，誰識當年郭解流？時局如斯危已甚，

閨裝願爾換吳鉤。

〔注釋〕 郭解 古俠士，史記遊俠列傳，記有朱家郭解事。吳鉤 刀名，詩人多言吳鉤

，如「含笑看吳鉤」。

對酒

前人

不惜千金買寶刀，貂裘換酒也堪豪；
一腔熱血勤珍重，灑去猶能化碧濤。

〔注釋〕 貂裘換酒 李白詩：「五花馬，千金裘，呼兒將出換美酒」。

黃金臺懷古

前人

薊州城築燕王臺，招士以財亦可哀。
多少賢才成底事？黃金便可廣招徠。

〔解題〕 黃金臺，在河北大統縣東南，一名招賢臺。燕昭王欲發憤圖強，廣招賢士，築臺以待郭瑰。

〔注釋〕 薊州 即河北薊縣。按今易縣定興徐水等處，皆有黃金臺。

失題二首

前人

祖國沉淪感不禁，閒來海外覓知音，
金甌已缺總須補，

爲國犧牲敢惜身？

不嗟險阻嘆飄零，關山萬里作雄行。休言女子非英物，
夜夜龍泉壁上鳴。

（注釋） 沉淪 卽陸沉意，見前註。 金甌 喻版圖。 龍泉 寶劍也。

觀日俄戰圖有感

前人

萬里乘風去復來，隻身東海挾春雷。忍看圖畫移顏色？
肯使江山付劫灰？濁酒難消憂國淚，救時應仗出羣才。拚將
十萬頭顱血，須把乾坤力挽回。

（解題） 民國前十二年，中國有義和拳之亂，俄兵佔滿洲，不肯退，且伸其勢於朝鮮。日本與俄協商不能決，遂宣戰，鎖旅順，進兵滿洲，所至皆勝。和議成，俄認日爲朝鮮宗主國，且以遼東半島之租借地，長春以南之鐵道，庫頁島之南部，讓與日本。

（注釋） 春雷 冬日無雷，春雷最早，以喻革命之爆發。

題芝龕記 六首

前人

今古爭傳女狀頭，紅顏誰說不封侯？馬家婦共沈家女，曾有威名振九州。
搗搗乾坤女土司，將軍才調絕塵姿，靴刀帕首桃花馬？不愧名稱娘子師。
莫重男兒薄女兒，平台詩句賜蛾眉，吾儕得此添生色，始信英雄亦有雌。
百萬軍中救父回，千羣胡馬一時灰，而今浙水名猶在，想見將軍昔日才。
謫來塵世恥爲男，翠鬢荷戈上將壇。忠孝而今歸女子，千秋羞說左寧南！
忠孝聲名播帝都，將軍報國有良姝，可憐誰倩丹青筆？繪出娉婷兩女圖？

（解題） 芝龕記傳奇，清董榕所著，紀女將軍秦良玉沈雲英故事，凡一百餘齣，傑作也！

（注釋） 馬家婦 秦良玉爲四川石柱土司馬千乘之妻，夫死，代領其軍，號白桿兵，屢破

張獻忠，保石柱無恙。 沈家女 沈雲英，浙江人。父爲道州守備，拒賊戰死，雲

英殺入賊營，奪其父屍而回。 平台 秦良玉奉命援遼，明崇禎帝於平台親賜詩褒

之。 左寧南 卽左良玉，福王時封甯南伯，擁兵四十萬，逗留武昌，既不討賊，

亦不勤王，坐視清兵南下，國破身亡，枉爲主帥。 將軍報國……句 據芝龕記所

述，沈雲英亦率師同時北征。秦之援遼，史有明證，沈是否同去，尙待考。

感憤

前人

莽莽神州慨陸沈，救時無計愧偷生。
搏沙有願興亡楚，博浪無椎擊暴秦。
國破方知人種賤，義高不礙客囊貧。
經營恨未酬同志，把劍悲歌涕淚橫！

（注釋） 神州 史記：「中國名曰赤縣神州」。陸沉 謂大陸淪胥，禍由人造。搏沙

謂無黏結力也。博浪 張良令力士操鐵錐擊秦始皇於博浪沙，此處省稱。

日人石井君索和即用原韻

前人

漫云女子不英雄，萬里乘風獨向東。
詩思一番海空闊，夢魂三島月玲瓏。
銅駝已陷悲回首，汗馬終慚未有功！
如許傷心宗國恨，那堪客裏度春風！

（注釋） 銅駝 晉書索靖傳：「靖有先識遠量，知天下將亂，指洛陽宮內銅駝歎曰，會見

汝在荊棘中耳！」汗馬 言戰功也。戰馬疾馳而汗出，故云「汗馬之勞」。

感時

前人

忍把光陰付逝波，這般身世奈愁何？楚囚相對無聊極，樽酒悲歌涕淚多！祖國河山頻入夢，中原名士孰揮戈？雄心壯志銷難盡，惹得旁人笑惡魔！

煉石無方乞女媧，白駒過隙感韶華，瓜分慘禍依眉睫，呼告徒勞費齒牙。祖國陸沉有人責，天涯飄泊我無家，一腔熱血愁回首，腸斷難爲五月花！

（注釋） 楚囚 晉書王導傳：「何至作楚囚相對泣耶？」後因借喻處境窘迫之稱。 煉石

……女媧句 史記：「女媧氏，嘗煉五色石以補天」。 「陸沉有人責」句 晉書

桓溫傳：「溫眺矚中原，慨然曰，遂使神州陸沉，百年丘墟，王夷甫諸人，不得不

任其責！」 腸斷……五月花句 斷腸花，秋海棠之異名。

黃海舟中感懷二首

前人

片帆破浪涉滄溟，回首河山一髮青。四壁波濤旋大地，一天星斗拱黃庭。千年劫盡灰全死，十載淘餘水尙腥。海上神仙渺何處？天涯涕淚一身零！

聞道當年塵戰地，祇今猶帶血痕流。馳驅戎馬中原夢，破碎河山故國羞。領

海無權悲索寞，磨刀有日快恩讎。天風吹面冷然過，十萬雲煙眼底收。

（注釋）

滄溟

海水瀰漫貌，卽以言海。

壘

音坳，苦戰多殺也。

領海

沿海國之港

灣內海也。

索寞

神氣沮喪貌。

作者小傳（生卒以民國紀元起算）

沈約（一四七一—一三九九）字休文，南朝宋吳興紹康人。篤志好學，博通羣籍，善屬文。歷仕宋齊梁三朝，未嘗有所薦達，政之得失，唯唯而已。創發詩文中應講宮商，主文盟者數十年。著有晉書、宋書、齊紀、梁武紀、四聲譜、及文集等傳世。

孔稚珪（一四六五—一四一一）字德璋，南朝齊山陰人。少涉學，有美譽，風韻清疎，不樂世務。內庭之內，草萊不除，中有蛙鳴，嘗笑謂客曰：「我以此當兩部鼓吹」。有北山移文，爲世傳誦。

虞羲（？——一四〇五前後）字子陽，南朝梁會稽餘姚人。七歲能屬文，盛有才藻，著有文集。

吳均（一四四三—一三九二）字叔庠，南朝梁吳興故鄣人。好學有俊才，爲詩號吳均體，詞旨奮發，人多效之。有後漢書注、錢塘先賢傳、齊春秋

、通史等書。

駱賓王（一二二八年前後在世）唐義烏人。七歲能賦，與王勃、楊炯、盧照隣、以文章齊名，號爲初唐四傑。徐敬業起兵，爲之傳檄天下，斥武后罪。則天見之歎曰：「有如此才，坐使流落不遇，宰相之過也！」敬業敗，亡命不知所之。有駱丞集傳世。

盛小叢（生卒不詳）唐越妓。李訥爲浙東廉吏，夜登城樓，聞歌聲激越，召至，乃小叢也！

李頻（一〇四八前後在世）字德新，唐睦州壽昌人。大中進士，宣宗時遷武功令，懿宗時擢侍御史，表建州刺史，卒於官。長於詩，有黎岳集。

吳融（？——一〇〇九前後）字子華，唐山陰人。幼力學，工辭調，昭宗龍紀進士，拜中書舍人，進戶部侍郎，以翰林承旨卒於官。有唐英歌集。

羅隱（一〇七九——一〇〇三）本名橫，字昭諫，五代梁餘杭人。爲錢塘令，

有善政，錢鏐辟爲從事。朱全忠篡唐，隱勸鏐舉兵討梁，鏐甚義之！隱能詩，爲文章富氣勢，所著多散佚。有讒書、兩同書及羅昭諫集。

趙

抃

（九〇四—八二八）字閱道，宋衢州西安人。爲人長厚清修，日所爲事，夜必衣冠露香以告於天。詩諧婉多姿，不類其爲人。有趙清獻集。

宗

澤

（八五三—七九三）字汝霖，宋義烏人。元祐進士，有文武才，初仕州郡，所至有聲。徽欽二帝北狩，澤以副元帥從磁州入援，屢戰皆勝，徒至開封府，進東京留守。北方憚澤威望，呼之宗爺爺，不敢復犯東京。澤前後請帝還京二十餘疏，俱爲姦人所抑，憂憤成疾，大呼「過河」者三而卒。諡忠簡，有宗忠簡集。

滕茂實

（七九八前後在世）字秀穎，宋臨安人。靖康初，以工部員外假侍郎使金見留，終身布衣，稱宋使者。歿於雁門。

陸

游

（七八七—七〇二）字務觀，號放翁，宋越州山陰人，早有文名，爲秦檜所嫉。游才氣超逸，言論剴切，憂國感時，一發爲詩，悲壯沉雄，直

可步武少陵。所著有南唐書、入蜀記、放翁詞、渭南文集、劍南詩鈔、老學庵筆記等。

陳傅良

(七七五—七〇九)字君舉，宋瑞安人。學於永嘉薛氏，得伊洛之旨，

又從南軒東萊聞爲學大要。爲太學錄，累遷至嘉王府贊讀，龍樓閣問寢不時，獨切諫，每以天性感悟孝宗父子。後知上意弗回，遂乞歸。寧宗初，除中書，與朱子同朝，疏留朱子，爲韓侂胄所忌，遂罷去。

樓

鑰(七七五—六九九)字大防，自號攻媿主人，宋明州鄞人。光宗時，位

致通顯，卒諡宣獻。

范

浚(七六五前後在世)字茂明，宋蘭谿人。紹興間，舉賢良方正，以秦檜

當國，不起。閉門講學，篤志求道，學者稱爲香溪先生。有香溪集。

戴復古

(七一四前後在世)字式之，號石屏，宋天台人。篤志古學，嘗登陸游

之門，以詩鳴，好游歷。有石屏集。

洪咨夔

(?—六七六)字舜俞，宋於潛人。著有平齋文集。

周 洎（生卒不詳）字子及，宋天台人。乾道二年進士，官國子監主簿。

陳 孚（六七二—六〇九）字剛中，號笏齋，宋台州臨海人。至元中，以布衣

上大一統賦，署上蔡書院山長，副梁曾使安南。累官至台州路總管府治中，致仕，卒於家。詩文不事雕斲，有集行世。

趙卯發（生卒不詳）字漢卿，宋昌化人。咸淳間通判池州，德祐元年，元兵克

池州，趙卯發與妻雍氏俱死之。初，元兵渡江，卯發繕壁聚糧爲守禦計；既而都統張林降，卯發知不可守，置酒會親友與訣，散家資與弟任僕婢，遂與妻盛服同縊。謚文節，雍氏贈順義夫人。

林景熙（六七〇年前後在世）一名景曦，字德陽，宋温州平陽人。官泉州教授

，宋亡不仕，楊璉真伽發宋諸陵，棄其遺骨，景熙爲採藥者以草囊拾之。又以理宗顛骨，爲北兵投湖上，復購漁者網獲，盛二函，葬越山，植冬青樹爲識，賦冬青行。著詩曰白石樵唱。

周 權（生卒不詳）字衡之，號此山，宋處州人。工詩，有此山集。

鮑 輓（生卒不詳）字以行，宋括蒼人。性嗜酒，授簡萬言，教授得錢，悉送

酒家，遇客，盡飲乃去。晚益傲誕，衲衣髮結，游青城不返。

趙孟頫（六五八—五九〇）字子昂，自號松雪道人，元湖州人。年十四，以父

蔭補官。宋亡，家居力學，以遺逸薦見，元世祖授兵部郎中，歷江浙儒學提舉，延祐中，累拜翰林學士。嘗奉詔書千字文，卒封魏國公，諡文敏。孟頫以書法稱雄一世，畫入神品，爲詩清邃奇逸，亦工散曲。妻管夫人，子雍、奕均善書。

潘 音（六四二—五五七）字聲甫，元紹興新昌人。（據浙江通志，一說天台

人）。十歲宋亡，見長老談崖山事，即愀然不樂。長從吳澄學，終身不仕，築室南湖山中，自名其軒曰待清隱居，有待清軒遺稿。

何夢柱（六四二前後在世）字巖叟，元淳安人。元咸淳乙丑登第，授台州軍事

判官，旋引疾去。元初累徵不起，築室著書，自號潛齋，有潛齋集。

汪元量（六三三前後在世）元錢塘人。宋亡，爲黃冠，自號水雲子。其詩慷慨

悲歌，多紀國亡北徙事。後人推爲詩史，有湖山類稿、水雲詞。

尹廷高（六二二前後在世）字仲明，號六峰，元遂昌人。嘗掌教永嘉，秩滿至京，謝病歸。有玉井樵唱。

楊維禎（六一六—五四二）字廉夫，號鐵崖，元諸暨人。舉進士。元末兵亂，浪跡浙西山水間。明興，天下大定，被召至京，肺疾作而卒。

宋 濂（六〇二—五三一）字景濂，明浦江人。幼英敏強記，元末，薦授翰林院編修，親老辭不就。隱東明山著書，歷十餘年。明初，以書幣徵，命授太子經，修元史。累官至翰林學士承旨知制誥，以老致仕，卒諡文憲。濂博極羣書，爲文醇深演迤，著有宋學士集，浦陽人物記等。

劉 基（六〇一—五三七）字伯溫，明青田人，元末進士，居官有廉直聲。佐太祖成帝業，封誠意伯，諡文成。基博通經史，尤精象緯之學，明初諸大典制，多出基與宋濂之手。其文閎深肅括，其詩沉鬱頓挫，著有誠意

伯文集。

胡奎（五八一——？）字虛白，明海寧人。博貫經史，尤長於詩。洪武中以

儒學徵官寧王府教授。人稱斗南先生，有斗南老人集。

劉績（生卒不詳）字孟熙，明山陰人。隱居不仕，人稱西江先生，有嵩陽集

。

張憲（五七一前後在世）字思廉，號玉筍生，明山陰人。少負才不羈，元亡

，變姓名，寄食僧寺以終。其詩磊落豪邁，今傳玉筍集。

劉仁本（？——五四五）字德元，明黃巖人，一作天台人。學問淹雅，工詩，

所作皆清雋絕俗，不染塵氛，有羽庭集。

朱希晦（？——五四二前後）明樂清人。隱居不仕，游詠山中，有雪蓬集。

于謙（五一八—四五九）字廷益，明錢塘人。正統末，爲兵部侍郎，也先入

寇，英宗北狩，謙力主戰，敗也先。英宗復位，遭誣陷棄市，有于忠肅

集。

張甯（四四三前後在世）字靖之，號方洲，明海鹽人。景泰進士，負志節，

持正義，爲汀州知府。工書畫，能詩，有方洲集。

徐 渭（三九一——三一九）字文長，一字天池，晚號青藤老人，明山陰人。

諸生，天才超逸，詩文圖畫皆工。曾客總督胡宗憲幕，後宗憲下獄，渭懼禍發狂，殺妻，遂繫獄；既免，以哭廟案被誅，有徐文長集。

鄭國賓（生卒不詳）字汝嘉，明蘭谿人。嘉靖進士，有臥雲堂集。

沈明臣（三五—前後）字嘉則，明鄞人。曾與徐渭同參胡宗憲幕。有豐對樓集。

趙天生（生卒仕履不詳）明鄞縣人。

陳良謨（三二三—二六八）字士亮，原名天工，號賓日，明鄞人，崇禎進士，張獻忠犯成都，良謨遣將據要害爲犄角，數敗賊。還朝未久，京師陷，與其妾時氏自縊死，諡恭愍。

陳函輝（三二三—二六七）初名煒，字木椒，改名後，字木叔，又號寒山，明臨海人。崇禎進士，除靖江令，福王立，起兵部主事，魯王監國，進兵

部侍郎，兼侍讀學士。江上師潰，入天台雲峰寺自縊死。有寒光集。

胡應麟（三二二前後）字元瑞，明蘭谿人。築室山中，藏書四萬餘卷，記誦淹博，有少室山房類稿詩藪等。

王用賓（生卒不詳）名賓，以字行，明鄞人。授休寧教諭，私諡曰清節先生，祀於學。有書隱、西上、南游諸集。

張國維（三一八—二六七）字九一，明東陽人。魯王監國，授兵部尙書，督師江上，力謀恢復；兵敗返里，事迫，投水殉國。有吳山水利書。

朱之瑜（三一二—二二九）字魯瑱，號舜水，明餘姚人。清兵陷南都，依黃斌卿於舟山，乞師日本；舟山陷，又往來於張煌言、陳輝軍，事敗赴日本。日水戶藩主德川光國以國賓禮之，終不就，卒於日本。之瑜精六經，傳朱王之學，有裨於日本文化不淺。日本學者私諡曰文恭先生。有舜水文集。

祁彪佳（三一〇—二六七）字幼文，號宏吉，明山陰人。天啓進士，官至御史

。南都失守，自投池中死。

林棟隆（生卒不詳）字無過，明甯波人。萬曆時進士。

王藥師（生卒不詳）字更生，明湖州人。

莊元宸（生卒不詳）字起貞，明鄞人。崇禎進士，官刑部主事，京師陷，迎魯王於天台，屢以時事進諫，王不能用。及清兵東下，元宸狂走山中，朝夕哭，疽發背死。

韓繹祖（生卒不詳）字茂貽，明烏程（即吳興）人。諸生，與總兵金有鑑等起兵，復湖州，兵敗，匿僧舍，見伶人衣冠上場，大慟而絕。有咏性堂遺稿。

爰丹生（生卒不詳）字彤寶，一字山夫，明嘉善人。

陳潛夫（二九八—二六六）字元倩，明仁和人。崇禎丙子舉人，榜名朱明，後更焉。除開封推官，擢監察御史，清兵下江東，率妻妾投水死。

陸培（二九五—二六七）字鯤庭，明仁和人，崇禎進士，除行人，家居死難。

張煌言（二九二—二四八）字元著，號蒼水，明鄞縣人。崇禎舉人，嘗與錢肅

樂等，奉魯王監國，起兵抗清，勸鄭成功取南京。煌言移師上游。所向
克捷，後魯王卒，煌言散兵隱居，爲清兵偵知，被獲，不屈死。有水槎
集、奇零草、北征錄、採薇吟等。

黃宗羲（三〇二—二一七）字太冲，號黎州，明餘姚人。雖殺父仇，莊烈帝稱

爲忠義孤兒。清兵至浙，與熊汝霖起兵抗之。魯王授左僉都御史，及魯
王傾覆，奉母隱居，畢力著述，學者稱南雷先生。有南雷文定、明儒學
案等書。

黃 逵（生卒不詳）字儀逵，明末山陰人。

毛奇齡（二八九—一九六）字大可，學者稱西河先生，清蕭山人。明季諸生，

明亡，祝髮讀書山中。康熙中，召修明史，後以病歸。著書甚多，有功
於經義。

徐 蘭（生卒不詳）字秀夫，清餘姚人，善書畫。

洪 昇（二五三—二〇八）字昉思，號稗村，清錢塘人。工樂府，名滿京洛，

著有長生殿傳奇。因國喪時，演長生殿斥革，窮困墮水死。有稗村集。

陸次雲（二五〇前後）字雲壬，清錢塘人。有澄江集、玉山集、湖濡雜記。

厲 鶚（二二〇—一六〇）字太鴻，號樊榭，清錢塘人。性嗜書，詩詞均成家

。著有宋詩紀事、遼史拾遺及樊榭山房集。

胡天游（二一六—一五四）字稚威，清山陰人。工駢文，有石筍山房集。

袁 枚（一九六—一一五）字子才，號簡齋，清錢塘人。少負才名，從政有能

聲。年四十，告歸，築隨園於江甯小倉山下，以吟詠著作爲樂，四方賓

客投詩文無虛日，享盛名五十年，世稱隨園先生，有隨園詩話、隨筆及

小倉山房集。

嚴遂成（約一七六前後在世）字崧瞻，號海珊，清浙江烏程人。雍正初進士，

乾隆元年舉「博學鴻詞」，歷官知縣知州，所至有聲。遂成天才駿發，

爲詩兼雄奇綺麗之長，工於詠物，讀史詩尤雋，自負爲詠古第一。著有海珊詩鈔及明史雜詠。

吳錫麒（一六六—一九四）字聖徵，號毅人，清錢塘人。乾隆進士，官翰林院及國子監。生平不趨權貴，名著公卿間；性至孝，以乞養歸里。主講書院，從游者衆。毅人天資超邁，好學不倦，詩境超妙，兼工倚聲傳奇；駢體文尤清華明秀，名重一時。著有正味齋集。

陳文述（一四一—六九）字退齋，號雲伯，清錢塘人。工詩，有閨詠秣陵集、頤道堂集、西冷懷古集、碧城仙館詩鈔。

袁祖志（生卒不詳）字翔甫，清錢塘人。

柴靜儀（生卒不詳）字季嫻，清武林人，沈鏐室。有北堂集、凝香室詞。

俞樾（九一—六）字蔭甫，號曲園居士，清德清人。道光進士，官編修，居吳門，以著書自娛，研究經學，旁及諸書。著有春在堂全集。

黃燮清（六二前後在世）原名憲清，字韻珊，前號吟香詩舫主人，清海鹽人。

工樂府，著有倚晴樓集、拙宜園詞及清詞綜續編。

查蕙纒（生卒不詳）清海寧人。父嗣庭獲罪，家屬徙邊。

秋瑾（三五—五）字玉貞，一字璿卿，又字競雄，號鑑湖女俠，清紹興人。

適湘潭王廷鈞。曾留學日本，入同盟會，與徐錫麟善。歸國後，從事革命，以在浙響應錫麟起義，事洩，坐黨獄死。有秋瑾集。

中華民國二十八年七月初版

薪膽叢書 第十種 兩浙正氣集 (全一冊)

定價國幣三角

外埠酌加運費匯費

主編者

浙江省抗日自衛委員會
戰時教育文化事業委員會徵編組

選注者

吳 召 宣

發行者

戰時教育文化事業委員會書刊發行部

印刷者

東南日報社印刷股

經售者

各地各大書局

(本書校對者周大煜)

封 底